

ERROR 404

(MIND NOT FOUND)



ERROR 404

(MIND NOT FOUND)

محمد حسن

نبذة عن المؤلف

مؤلف هذا الكتاب هو محمد حسن، شاب من مواليد ربيع عام 1999، درس وتخرج من كلية دار العلوم في جامعة القاهرة، يعمل معلمًا وقد كتب عدة روايات ولكن التي تم نشرها منها هي رواية (ديجافو)، وهي رواية (دراما - خيال علمي)، ويبدو أنها أعجبت أغلب من قرؤوها.

كانت روايته المنشورة بالفصحى، وعندما قرر أن ينشر كتابًا باللهجة العامية قرر أن يكون كتابًا كوميدياً، إذ شعر أن العامية ستكون ملائمة أكثر لهذا النوع من الكتب.

نبذة عن الكتاب

هذا الكتاب من نوعية الأدب الساخر، يحكي مواقف حياتية يتعرض أغلبنا لها، خلق المؤلف شخصية (محمد) وهو شاب كانت لديه الكثير من الأحلام ولكنها لم تتحقق، فبدأ يأخذ الحياة بهزل، وتوقف عن أخذها بجدية، ونتج عن هذا الكثير والكثير من المواقف المضحكة في حياته، يتناول المؤلف بعضها في هذا الكتاب.

صديقاً البطل المقربان في أغلب القصص هما: (حمزة - محمود)، وزوجته التي تظهر معه دومًا هي (منى) التي تزوجها في شتاء 2016، ولم يُنجبا قط.

الشخصيات والأحداث أغلبها من وحي الخيال، وحتى ما تم استلهامه من الأحداث الواقعية قام المؤلف بتغييره بحيث ما عاد يطابق ما كان على أرض الواقع، أما غير ذلك فمن وحي خيال المؤلف بالكامل.

إهداء

(لا بد منه)

إن كنتُ سأهدي هذا الكتاب لأحد فأنا أهديه لكل من
عاداني أو أحببني أو أذاني، شكرًا، لولاكم لما
استطعت الإكمال، كرهكم هو وقود سيارتي في
الحياة، يتم إحراقه ونسير به، فشكرًا لكم.

وأهديه لكل من أحب كذلك، فكل من أحب يعرف،
وكل من أحب مشكور، وشكرًا على حسن تواجذك.

مقدمة المؤلف

اممم.. هلا.. جايين تقرأوا الكتاب؟ حلو.. جميل.. كتاب
حلو وشغل ونضيف يعني بصراحة.. آها.. بص هما
قالولي لازم تكتب حاجة في الأول فأنا مش عارف أقول
إيه، ف.. من هنا، اتفضل يا أفندم، اتفضل، اتفضل انت
الأول، اتفضل، اتفضل، اتفضل، ما تتفضل يا عم!
سلام.

"مقولة جامدة جداً لازم تتحط في الأول"

مؤلف أجمد من المقولة - 2020

أسيبكم مع الكتاب، لو الكتاب عجبك متنساش تعمل لايك
وشير وسبسكرايب عشان تعم ال(هاهاها)

(1)

من ساعة ما اتجوزت وأم حياتي كلها انكركبت! مسؤوليات وزفت،
وكل شوية اتصال اتصال رن رن رن، إبييه! هو أنا موظف
في الشركة والبيت؟! ده أنا لو عبد عند أبو لهب كنت هاخذ راحة!

المهم، كنا في يوم أجازة عشان "عيد العمال"، مش فاهم إيه العيد في
كده بس ما علينا، خرجت مع زمايلي محمود وحمزة كالعادة، قلنا
نروح مول العرب ولا بتاع، أهو أي بتجان بس نحس اننا أحرار من
العبودية ليوم واحد، على الأقل أنا هحس بده، محمود مش متجوز
وحمزة مستريح مع مراته وأنا بحقد عليهم إلهي يولعوا.

واحنا في موقف العربيات بتاع أول عربية هنركبها تررن تررن
تررن.

- أوقفف.. استنوا أرد على مراتي.

- ردي يا سوسن.

- ألو.

- أبوة يا حبيبي بقولك.

- نعم..

- كنت أ.. انت بترد كده ليه؟!!

- أرد ازاي يعني يا منى؟! ما بقولك "نعم"!

- مش عايزة منك حاجة، سلام.

وقامت هوب، التليفون اترزع في وشي.

- طب يا بنت الـ... أستغفر الله العظيم يا رب.

- في ايه بيني؟

- ملكش فيه، كمل شات مع مراتك يخويا.. حاجة تعل..

وصلنا المول هناك وكل ده ضميري بيأبني عاوز أصلحها، حاسس
اني شيرير كده.. المهم.. اتصلت بيها.

- رصيدك الحالي أقل من..

- خلاااص عاالرف! هو مش كل ما هكلم حد هتذليني! خلاااص!

- لو عاوز الكولتون دي..

- والله ما حد عاد بيستخدمها محروق أبو الكولتونات كلها.

قعدت أسمع الأغنية السامجة بتاعت الواد اللي بيوقع هرمونات من كل
حتة لحد آخرها عشان الهااانم مردتش على جوزها! الهاانم مردتش
على جوزها!!!!!!

- يا محمد خلاص بقى متتكش الخروجة!

- ما انت مش متجوز! مش متجوز يا سي زفت! مينفعش مراتك تقل
أدبها عليك! كونها متردش دي قلة أدب!

- أفولك أنا بعمل إيه مع مراتي؟

- لا متقوليش يا سي حمزة.. متقوليش يا أستاذ/ أنا جامد جدًا وأحسن
منكم، إلهي تولعوا في يوم واحد انت ومراتك.

أيوه انتوا كنتوا فاكريني بدعي عليهم من وراهم بس؟ لأ وقصادهم،
هو وهي.

فضلوا يهدوا فيا لحد ما واحنا في محل لبس شياكة كده:

- الله عليك بقى! أيووة بقى! ده الحريم هنترمي عليك.

- يا عم عيب بقى الواحد متجوز..

- لا بس بص، والوو، حاجة مش ممكن.

- فعلاً؟ وانت إيه رأيك يا حودة؟

- لا حاجة عال العال خالص، حاجة ألاطة.

بيص في المراية في المحل وأنا شبه حنفي الأبهة كده ويقول:

- مش حاسين يا شباب اني شبه القتلة المأجورين بالجاكت الجنز ده؟

- مأجور؟ لأ انت في العادي شبه القتلة بس اللي بيقتلوا حباً في القتل
مش مأجور ولا حاجة.

وضحك السنين بقى هو والواطي التاني عليا.

- لا بس بجد والله حلو؟

- والله جامد.

- طب إسطا، بكام ده يا ريس؟

البياع مكانش مركز معانا عشان كان مشغول بيحاول يشقط البنط اللي بتشتري جاكط ولادي لسبب ما- فندهت عليه تاني.

- يا ريس!

- ريس إيه يا محمد انت قاعد على مركب؟

عينه اتشالت من على البنط أخيرا لثانية وبصلي وقالي:

- أوامر يا باشا.

- الجاكت ده حلو عليا؟

- حلو؟ ده هياكل منك حطة! ده اتفصل عشانك!

هو أنا ليه بدأت أحس ان كله بيحور عليا وبيطبل لي عشان أشتري
وخلص؟

- أصلي مش حاسه..

محمود وحمزة فجأة اتشالت البهجة من على وشوشهم ونزلت على وشوشهم لعنات آلهة الإغريق وتعاسة مطلقات الكوكب كلها بقت مرسومة في عينيهم.

- لا يا باشا والله زي القمر، ده انت البنات هتـ..

- لا متجوز شكرا مش عايزهم يترموا عليا.

- لأ كنت هقول هتمشي من شارع تاني هاهاهاها.

وقعدوا كلهم يضحكوا ضحكات غير مبررة وغير منطقية لأن مفيش شيء مضحك في انك تتريق على رجل شيك بيشتري جاكيت جنز راقى جداً تم استخدام أخوه في فيلم حنفي الأبهة ومسرحية الواد سيد الشغال في 2020، حاجة تـل..

المهم اشتريته واكتشفت انهم كانوا بيجاملوني في كل حاجة يشتريها عشان يخلصوا بسرعة لأنني انتقائي جداً وبقعد أبص على 400 صنف قبل ما أفكر حتى أشتري حاجة.

خدت صورة لنفسي بالجاكيت الجديد الشيك مع الكوتش الجامد الأبيض اللي جيبته وأنا قدام المراية في المحل عشان أبعثها لمراتي، كوتش زي بتاع العيال اللي بينور، (هو مش انتوا متخانقين؟!)أبوة بس خلاص لازم نتعدى حنة الخناقة دي على طول، اتعلمت الحنة دي ومهمة أوي، ولأ مش من حمزة ومراته اللي عاملين نفسهم متخصصين علاقات.. إلهي يولعوا..

بعثلها الصورة على الواتس وتحتها استيكر بوس، اللي هو اللبس ده إغراء خالص يعني، هنتقولي إيه الإغراء في حنفي الأبهة هقولك دي

مراتي وده الشات بتاعنا وحاجة متخصكش خالص يعني بصراحة،
قلة الذوق دي..

المهم الرسالة موصلتس تليفونها فعرفت انها قافلة الواي فاي،
فاتصلت.

- رصيدك الحالي أ..

- والله هشحن، يمين بالله هشحن، منكم لله عقدتوني.

- في إيه يا محمد؟!

- يعم فوكك مني بقى.

- لو عاوز الكولتون..

- والله العظيم لخليها تشيل أم الكلتون دي لما أروح البيت، أقسمت
بالله.

مردتس بردو.

- أنا هتجنن! ازاي متردش عليا مرتين ورا بعض؟

- مفكرتس - ولا مؤاخذة يعني- يكون - مع كامل احترامي ليك -
حصل حاجة؟ فانت محتاج تتطمئن عليها مش تغضب منها..

- حمزة.. هديحك.. يمين بالله لو ما بطلت تتدخل في علاقتي بمراتي
هخليك نايم مرة وأديحك وانت نايم، فاهمني؟!

- زي ما يريحك يا حبي..

- إلهي تولع انت ومراتك..

واحنا قريب من البيت بنجيب آيس كريم من عند سلطان اتصلت لأخر
مرة كفرصة أخيرة بديهالها عشان ترد عليا قبل ما أروح البيت
وأعطها في الفرن على درجة 425.

- رصيدك الحالي..

والله ما قدرت أكمل، قفانت، مش هقعد أسمع الست دي والكولتون ابن
الستين *** ده تاني، أنا جاي البيت يا منى وهقلبها على دماغ اللي
خلفوكي!

وصلت البيت ودب دب دب دب عمال أهدى على الباب مبيتفتش،
فتحت شنطة اليد بتاعتي وطلعت المفاتيح وفتحت، نور الشقة مقفول.

- خرجت من غير ما تقولي! يمين بالله لتباتي على مشاية الحمام يا
منى..

فضلت قاعد نص ساعة قدام المرآة عمال أتأمل جمالي وجمال حنفي
الأبهة اللي باصصلي في المرآة لحد ما سمعت مفتاح في الباب،
مسحت الابتسامة من على وشي وحطيت وش الغضب على طول
وأول ما دخلت:

- السلام عليكم.

وبتبتسم!

- عليكم السلام ورحمة الله، كنتي فين؟

بنبرة أمين شرطة يقولك تنزل من العربية عشان الكلب بيهو هو على
شنطة العربية عندك وشاكك فيك انك بتهرب مخدرات وسلاح.

- ومبتريش على التليفون ليه؟

- احم.. كنت بجيبك حاجة ونسيت التليفون هنا..

وبتبتسم ابتسامة بلهاء كده، طبعا أنا اتثبتت وسكتت كده، طلعت كانت
هي اللي عايزة تصالحي، فرحت من جوايا بس حواجبي كانوا لسه
حاضنين بعض زي ما أنا وقعدت أبص على الشنطة وهي بتتكش فيها
وعاوز أنتشها من إيديها زي العيل الصغير وأشوف جابتلي إيه، باظ
يطير اللي كان نفسي فيه؟

- بص، بالذمة مش قمر؟

طلعت من الشنطة جاكت جابتهولي.. جاكت.. جنز..

- كنت عاوز تجيب جاكت.

أنا حياتي تعيسة..

(2)

- يا منى مش كل ما هنيجي رايجين عند أمك هتعمليلنا قصة كأننا رايجين معسكرات فييتنام!

- يا حبيبي عايزين كل حاجة تكون مظلوبة بالشعرة بس..

- لأ يا ماما، لأ، (انتي) اللي عايزة كل حاجة تكون بالشعرة، أنا بروح لأمك بالترنج عادي!

- يا عم بقى خلصنا يلا والبس أم بنطلونك خرينا ننجز انت اللي معطلنا أهو.

بقيت عايز أمسكها من دماغها أفعصها كده بس دخلت أوضتي لبست بنطلوني زي الشاطر ودخلت فيه القميص الآخر شياكة وخرجت، قاعدة بتعمل إيه؟ بتخلص حلة المحشي!

- إبيه!! انتي بتعلمي أكل واحنا رايجينها لبييه؟! هما جعانين؟! احنا رايجين لقرابيننا في الصومال؟! واخدة أكل لبييه؟! ما بيعرفوا يطبخوا يا ماما!

- يا عم يعني اليوم اللي هتقعد معاها فيه هتقضيه في الطبخ؟ ما نريها حتى في اليوم ده يعني!

- يوم إيه اللي هتقضيه في المطبخ حبيبة قلبي؟ أنا لما بروحلها بترميلي طبق البيض اللي اتعشوا بنصه امبارح! انتي بتهزري؟

- محمد! اعد عطلنا كده!

سبحان من منعني اني أدب وشها في حلة المحشي اللي مطلعة كمية
دخان مخالفة للمنطق دي.

- قل للسواق يسرع شوية..

- هو هيشغل النايتروس يعني ويطلع نار من الشكمان ويخش في
بوابة زمنية يخترق حاجز الصوت عشان واحدة رايحة لامها؟ ما
تهدي يا ماما مستعجلة على إيه؟!!

- أصل المحشي سخن على رجلي أوي..

ديرت وشي عشان أعرف ابتسم ابتسامة الأنمي الخبيثة الشريرة وأنا
مبسوط فيها، نعم! مراتي! ليك فيه؟!!

وصلنا عندها و- معلش- شغل النسوان بقى وبوس ولزوطة وأحضان
وقرف، أنا حماتي عارفة، آخرها بتيجي عندي وتسلم عليا سلام
رجالة، مليش أنا في المُحد.. في الدلع ده..

قعدنا ودخلت أغير في أوضة حمايا -الله يرحمه-، وأثناء ما أنا -
لمؤاخذة- بلبوص ألاقى ربنا يبعد عنك كده وعن السامعين عيل ابن
ستين *** بيطلع من تحت السرير ويخضني، ده من الأيام اللي كنت
هخش السجن فيها، الواد يا عيني كان عارف اني جاي وعابز يهزر

مع (عمو) اللي جاي ومش تعبان ولا حاجة ولا عايز يريح، لأ عايز
يتفرع خض من حنة عيل صغير بس.

لا إرادياً شطت دماغه برجلي واتهيدت في خشبة السرير وقعد يعيط
وهكذا وقعدوا يصرخوا وانت متوحش ومعندكش قلب وانت قاسي
أوي أوي والهري ده وأنا طنشتهم وفتحت حلة المحشي وقعدت أنقنق
لحد ما يخلصوا نواح.

قعدنا بعد الغدا نهري في أي بطيخ عشان نملا الصمت بس وقعدنا
نتكلم في كل حاجة ممكن تتخيلها لحد ما بقينا بنتناقش في ليه العنكبوتة
الأنتى هي اللي بتبني البيت مش الرجل، وهما بقوا بيشرحوا أد إيه
المجتمع العنكبوتي مجتمع ذكوري همجي متوحش ولازم العنكبوت
الراجل يدي مراته حجمها ويجبلها شنطة جديدة وجزمة جديدة في كل
فلانتين اللي هو مش بناعنا أصلاً، وفي نهاية كل نقاش كنت بحط
راسي على كفي وأفكر نفسي ان الانتحار حرام.

انتهى اليوم على خير الحمد لله وسلمت على كله ما عدا الواد الصغير
قريبهم اللي فضل قاعد باصصلي بکراهية مكانتش عند هتلر. وطبعاً
زي كل مرة أمها تعزمنا نبات وهي وأنا ومراتي عارفين ان مفيش
مكان لكلب ينام فيه فينقول: "لأ شكراً" وعزومة مراكبية وشغل آخر
نبيلة، بس كده خلاص خلوني أنام بقى، أبو دي قصة.

(3)

أنا عمري ما رححت كنتاكي وماكدونالدز والحاجات دي خالص، هو فول وطعمية من عند موسى أو جبنة وفطيرتين وشوية عسل وهكذا والدنيا بتمشي، لكن أكل الأغنياء ده مليش فيه، جه بقى حمزة باشا صديقي اللدود إلهي يولع هو ومراته في ليلة واحدة واتصل بيا ومحمود على الخط وقال:

- عازمك على ماكدونالدز!

- يا عم طب قول السلام عليكم، انت بتذلني؟ لازم تحطها أول حاجة يعني؟ أعود بالله، مش عاوز حاجة يا عم منك.

قام محمود دخل في الكلام وقال بصوت واطي قال يعني كإني مش هسمعه:

- قلناك هينكد الحوار.

- نعم يا سي زفت انت؟

- هو مراته مطهقاه في عيشته وبيطلعها علينا احنا.

مش هقعده بقى أرغي وأخذ ورد قمت قافل في وشهم، أنا ناقص قرف؟ كملت تمديد على السرير بستمتع بوقتي لحد ما مراتي تيجي تكلمني في حاجة وترجع لي رغبات الانتحار تاني.

تررن تررن بيتصلوا بعدها بيتاع 40 دقيقة.

- نعم!

- بيني يلا جينا لك عند البيت أهو هنخرج.

- انتوا هنا؟

- أيوة تحت عمارتكم!

- ببص من شباك أوضتي ومراتي معدية بتقولي:

- في إيه؟

- هششش.

قعدت أبص عليهم لقتهم واقفين حمزة باصصلي وبيسلم ومبتسم
ابتسامة بلهاء ومحمود عمال بيصبص لكل حُرمة عينه تيجي عليها.

- نازل لك يا ابن الـ*** انت، جاي شارعي تعاكس جاراتي يا نجس!؟

قلت لحمزة:

- طيب نازل، اتهدوا في حنة.

- مش هنطلع نستنى فوق؟

- لأ مراتي هنا.

- طيب.

وهي بتقوللي:

- ميين؟ ميين؟ مين اللي بتقولهم مراتي هنا؟

- يا ستي أصحابي يووه.

- طب ومالك محمود كده؟

- محمود عبد العزيز هأهاأ.

- انت خارج معاهم؟

طبعا تجاهلت فكرة انها معملتش أي اعتبار لألشتي الجبارة اللي أي كوميديان ممكن تجيله سكتة قلبية من الضحك عليها، هي عشان اتعودت على العظمة دي.

- أيوة.

- رايعين فين؟

- هو تحقيق يا منى؟ واخرجي يلا عشان ألبس.

- مش تحقيق أنا مجرد سألت رايعين فين.. وبعدين ما تلبس قصادي ما أنا مراتك!

- منى، برا، برا!

- بتطردي يا مجرم؟!!

لبست ونازل وبتسأل تاني بنت اللذين!

- هاه رايحين فين بقى؟
- رايحين ننط من ناطحة سحاب، تيجي؟
- اشطا، دايسة.
- ع المطبخ، يلا سلام.
- وقمت قافل الباب وهي بتبرطم بتقول حاجة.
- طول الطريق جدال عن مين المفروض يمسك الزمالك وأنا مليش في الكورة وحاسس اني عيل صغير قاعد وسط جلسة عائلية ومعديش أي أم فكرة عن أي بطبخ بيتعجن في القصة دي.
- وصلنا هناك ودخلنا ومكان فاخر كده زي الأفلام، وأنا متعود على محل موسى بتاع الفول والطعمية، المهم يا سيدي قعدنا وأول حاجة قائله:
- حمزة..
- نعم.
- انت اللي عازمنا صح؟
- صح.
- أنا مش هطلع مليم!
- حاضر، متطلعش محفظتك، ارميها أصلا خالص كده كده فاضية ملهاش لازمة.

- ماشي يا ابن الـ.. ماشي.. لولا اننا وسط الأغنيا كنت شرشحتك، لما نخرج.

أبوة أنا نظرتي لكل اللي بياكلوا من المطاعم دي انهم أغنيا، ليك فيه؟
كملنا كلام واحنا بنهمس عشان مش عايز حد من الأغنيا يسمعي،
فحمزة بيقولي:

- وبعدين هنا مش مكان غالي أوي يعني، مكان رخيص بردو.

- فعلاً؟

- آه.

- طيب.. بظمن يعني.. أصل في أماكن بيوصل الساندوتش الواحد فيها
عشرين جنيه! انت متخيل؟!

في اللحظة دي محمود معرفش يمسك نفسه وقام راقع بالضحك
ضحكة عاهرات رنت المطعم كله ووصلت للشيف جوه.

- بيني متكسفاش اسكت هههههه.

حمزة بيقولي أنا كده! (أنا)! وسايب فتاة الليل اللي جنبتي يضحك بأعلى
صوته!

- هتطلبوا إيه يا أفندم؟

حتى الجرسون ابن اللذين كان بيضحك ويحاول يمسك نفسه وهو مش
عارف الأخت اللي جنبتي بيضحك على إيه أصلاً.

- واحد بيح ماك و.. هتطلب إيه يا محمود؟

ومحمود لسه شغال ضحك وبيحاول يكتمها بس مفيش فايذة وبينهج يا عيني فقال له:

- مش.. مش.. مش قادر.. هههه.. أي حاجة اطلب أي حاجة ههههه.

وأنا قاعد عايز أطخه بالنار.

- طيب واحد بيح ماك تاني، وانت يا محمد؟

قمت رمثله بصة من بتاعت الأمهات لما الواد يعمل حاجة غلط وفي ضيوف قاعدين، اللي هو "الويل لك أيها اللعين، ستدفع الثمن!"، عشان مش عارف حاجة من الكلام ده.

قام قال له:

- وواحد تشيز برجر.

الراجل خد الطلب ومشى وأنا لاحظت حاجة فقلت لحمزة:

- انت ليه قتلته حاجة مختلفة عن اللي انتوا طلبتوها؟

- اللي احنا طلبناه بيح ماك، ده كبير خالص، طلبتلك انت حاجة أصغر عشان معرفش هتعبه ولا لأ، ولو عزت تاني أجبلك عادي.

- هو انا عيل صغير يا حمزة؟ إيه اللي "لو عزت تاني هجبلك" ده؟

شوية كان محمود خلص ضحك وتوقفت هستريا الضحك عنده وجفت
المياه اللي كانت معومة فشته وقعد يمسح الدموع من على عينيه.

محبش أنا الصمت ده بقى كده فعمال أبص في المنيو ويقول لحمزة:

- بيج ماك يعني (ماك الكبير)، أنا بفهم في الإنجليزي وبتاع، بيج
يعني كبير، مين بقى ماك الكبير ده؟ صاحب المطعم؟

ورقع بالضحك بقى وشغل عاهرات والمطعم كله قعد يضحك على
ضحك محمود بتاع شقق الدعارة وحاجة قمة الخرا، محروقة دي
تجربة يا أخي، ماله موسى؟

طبعا الحساب جه بعدها وعينك ما تشوف إلا النور، محمود وحمزة
حرفياً كانوا بيشدونني من القميص لحد ما أول ثلاث زراير فوق
اتقطعوا وبقيت نصف عاري وأنا بزق عايز أخش أضرب الجرسون
اللي طلع يجري على المطبخ جوه بعد ما سمعت الحساب وقمت له
وعلى وشه دعر ألف قتيل في الحرب العالمية وهما شايفين الصواريخ
نازلة عليهم، ممكن سؤال؟ ماله موسى؟

(4)

فاكر العيال اللي كانوا مشهورين في الكلية أو في المعهد معاكم وروشين وكله عايز يبقى صاحبهم وبيخشوا يهزروا في كل محاضرة ويضحكوا المدرج كله ويدياقوا الدكاترة وشغل عمر وسلمى ده؟ أنا.

بس مكنتش بتاع بنات والله، هو شغل عمر وسلمى بس من غير البنات، مكنتش أعرف أقعد هادي، كنت عارف في كل محاضرة هعمل إيه، وهالش على أنهي دكتور وأنهي دكتور لأ، ولازم أقعد في نقطة تخلي النكتة توصل لأكبر عدد ممكن حواليا، كان ده أهم شيء بعمله في الجامعة، ستاند أب كوميدى، ما أنا هجيب جمهور منين أستعرض عليه مهاراتي في الكوميديا والروشنة والجمدان فلازم أستغل وجود جمهور جاهز، وتولع أم المحاضرة والتعليم كله.

طبعا ده كان غلط بس ما علينا، جه واد صديق سوء مرة عاوز يبوظني وحب هو كمان يستفيد من شهرتي دي وان الدكاترة عارفيني بالاسم وكنت بشك انهم في أوضة الكنترول بيحطوا ورقة عريضة على التراييزة فيها انهم ازاى يمنعوني من تبوظ كل محاضرة بتحصل في الكلية، لأن كنت لما بتطرد من محاضراتي بروح محاضرات السنوات الثانية أضحكهم وأتطرد بردو، يمكن فكروا في الآخر يحطولي السم في البطاطس السوري بالاتفاق مع صاحب الكافيتيريا، يلا الحمد لله اني هربت منيهم على خير.

المهم، الواد بقى عايز يخليني أظبطه مع بنات! الفاجر الداعر.

- يسطا انت اقعد معايا قدامهم مرة في مرة يعرفوا اني صاحبك فأروح الأغيهم وبتاع فالعملية تجيب يعني.

بصنله من فوق لتحت بقرف كده وقتلته:

- انت بتتكلم زي الشاممين ليه؟! إيه اللي "الأغيهم" و" العملية تجيب"، انت ليه محسني انك هتغتصبهن؟ أنا نفسي خايف منك ابعده كده!

- ههههههه، يسطا بجد والله، هزر معايا على الجروب حتى، انت بتنزله المنشور بيحب بالمائتين والتلنومية تفاعل، واللي بيعلقوا كلهم بنات ما عدا محمود صاحبك اللي بيخش عشان يسيطك وهو محدش يعرفه هو أساسا.

- لأ هتغلط في محمود هزعلك.

- يسطا معلش، بس بجد يعني، ظبطني حتى مع البيت ريهام دي، واقفة هناك أهي مع صاحباتها بتبص علينا، يلا يسطا بقى.

- يعم شيل إيدك من على كتفي، إيه اليأس اللي انت فيه ده؟! ده انت لو أمك جابتلك قطة هتغتصبها ابعده!

المهم الواد عرف يوصل لريهام بردو بعد كده مش عارف وصلها ازاى والبت دي بتكلم 90% من العيال بقرف، ضرب في دراعها حقنة هيروين وبيبيعولها ولا إيه مش عارف. آه وفاكر موقف مع ريهام دي كسفتها كسفة السنين، كنت قاعد في الطريقة بتاعت الكلية

بقرأ رواية وحاطط السماعات وكانت جاية مبتسمة ابتسامة متخلفة كده
وحاضنة كشكولها زي فاتن حمامة وشغل إعاقه وشفتها من بعيد
وبعدين كملت قراية، فجت عندي وبتقولي:
- أستاذ محمد..

وأنا مش سامعها عشان حاطط السماعات ومنتهيتش ان في واحدة
واقفة جنبني عشان كذا بنت مرة كنت وأنا قاعد في أي حنة متحلاش
الوقفة غير قدامي بالطبط وتتكلم مع صاحباتها ولا في التليفون، ببقى
عايز أشوطها برجلي وأقولها: "ما الدنيا والاسعة!! شفناها خلاص
شاطرة غوري بقى!"، المهم.
- أستاذ محمد..

شلت السماعات وبصيت فوقيا لقتها موطية ناحيتي والابتسامه
المعتوهه اللي قللتك عليها و:

- انت تعرف دكتور محمود صح؟

- دكتور محمود مين؟

- دكتور محمود السعيد بتاع الشعر.

- آه، اشمعنا؟

- أصل كان في حاجة عاوزاها منه وهيرفض، بس لو انت كلمته
هيوافق..

- مش شرط لأ، وبعدين انتي اللي عاوزة الحاجه انتي اللي تكلميه.

- معلش يعني كخدمة، أصل قلت لعلياء عاوزة حد يساعدني في الحوار ده قالتلي قولي لمحمد، محمد هيكلمهولك متخافيش، هو كل الدكتور عارفينه.

بقيت عايز أقولها: "مين بنت الو*** علياء دي اللي ماشية تتكلم باسمي؟ محمد مين اللي هيساعدها يا تلاقيح الجنت يا حثالة الشوارع؟! بس مقلتش كده طبعاً، وانكسفت فقتت وقلتلها:
- طيب، تعالى.

وغضب الدنيا جوايا بقى وإرهاق السنين، عيلة حيوانة، حتى كوباية القهوة الفرناوي اللي كنت حاططها جنبي بطفحها نسيته، لحد اليوم ده عمال أتخيل مين شربها بعد ما قمت وأحقد عليه، أه قهوة ورواية، كنت كلاشيه في نفسي ساعات، المهم.

وصلنا مكتبه وقلتلها: "خليكي هنا على ما أكلمه"، قالتلي ماشي، دخلت المكتب و:

- أستاذ محمود.

ابتسم كده ابتسامة تكاد تكون ضحكة وقالني:

- إيه يا راجل مبتعديش عليا ليه؟

- والله مبتقتش باجي كثير، بقولك.

- اتفضل.

أستاذ محمود شاب شوية على فكرة فمتستغربش انه روش.

- في بنت بكرها عمالة تقولي كلملي أستاذ محمود واتوسطلي ومش عارف إيه.

- تتوسطها في إيه؟

- مش عارف مسألتهاش، عشان مش هتفرق.

- اشمعنا؟

- بص أيا كان اللي هتطلبه اكسفاهلي، عايز أشوفها بتتخرج قصادي.

وعلى عنيا شر بقي ومبتسم ابتسامه واصله لوداني كده.

- طب ليه بيبي حرام عليك! ليه يا محمد كده؟

- اسمع بس، البيت دي تنكة وقارفة الناس كلها ويتعامل أصحاباتها البنات حتى بنتناكة، وعيلة سمجة جداً وعايز أنتم منها عشان قومتي من قعدتي وعايزة تشغلني عندها، وواقفة برا دلوقتي.

- حححح، طيب، هشوف هي عايزة إيه، ولو حاجة هبلة هقولها لأ.

- واكسفها ماشي؟

- حرام عليك بقي، قولها تخش طيب.

طلعت وابتسمت ابتسامه الجرسونات لما يبقى مش طابقك بس بيبتسم في وشك عشان ميخسرش شغله.

دخلت المسكينة ومش عارفة الوغد اللي متوسطها مجهز إيه.

- بجد يا دكتور؟! ده شرف كبير والله ان كلام زي كده بييجي من
حضرتك!

وأنا واقف مش عارف أقلب الترابيزة عليهم هما الاتنين ولا أنط من
شباك المكتب وأريح نفسي، اتفاقنا يا دكتور! الاتفاق بتاعنا! ليه كل
اللي ياما وعدني بيه واللي اتفقتنا زمان عليه! ينسأاه! بتخوني عشان
حرمة يا دكتور؟ هي دي أخلاق الدكاترة؟!!

- لا فعلاً يا ريهام ما شاء الله عليك، خدي كمان رقم تليفوني
الشخصي بس متديهوش لحد ولو في أي حاجة عاوزاها أو مساعدة
في الديوان ده قوليلي وأساعدك فيه، وفي دار نشر كمان بتعامل معاها
وأعرف مسؤولين فيها، ممكن يطبعولهلوك ويمشوا معاكي واحدة
واحدة في الفلوس خالص، هقولهم انك تبغي.

رقم التليفون؟ رقم التليفون اللي ادتهولي وقلتلني اني الطالب الوحيد في
الجامعة اللي مديله رقم تليفونك؟ في كام حد ثاني معاه رقم التليفون يا
دكتور؟ خلاص أنا مستعد لأي طعنات.. الحياة طلعت قاسية زي ما
قلت يا أبويا.. قاسية وأوروبا.. ههه.. المهم أنا في اللحظة دي بقيت
واقف بالأبيض والأسود وفي قلب مكسور اترسم فوقى والدنيا بقت
بتمطر عليا أنا لوحدي في المكتب.

- عقبال محمد لما يعرف يكتب حاجة زي كده ولا يحضر محاضراته
حتى، اتعلم يا أستاذ!

الخيال.....الخيال.....الخيال.....الخيال.....الخيال.....الخيال.....الخيال.....الخيال.....الخيال.....الخيال.....
في حد، قالولي هيخدلوك ده بجد، حرام عليكم، قلب طاهر بريء
ينكسف كسفة زي دي؟!!

- ماشي يا دكتور، كتر خيرك..

قامت هي بقى بتجر ناعم معايا وبتقولي:

- منترعلش يا محمد، هتعمل أحسن من كده مائة مرة بإذن الله.

- إن شاء الله، أصلًا الشعر ده للناس الفاضية.

في هذه اللحظة، وأنا محاط بكتب الشعر من كل ناحية، استيقظت على الحقيقة المؤلمة التي صفعنتي قائلة: "انت في مكتب دكتور الشعر يا متخلللف!!".

نظرتة ليا خلتني أحس بالخوف.. الضياح.. فقدت اتزاني.. وسقطت مغشى عليّ.. استيقظت على صوت أمي تصرخ و..

لا لا محصلش حاجة من ده، هو بس قال لي: "أبوة واللف في الجامعة والمرقعة والقعدة في الطرقة والهزار في المحاضرة للناس المشغولة، انت صح".

ضربة بعد ضربة، لم أعد أتحمل، لقد دمرني، أشعر بشعوركم يا إخوة يوسف، ألق أخيك في البئر فيصبح ملغًا، أردت منه أن يذلها فانقلب السحر عليّ، لماذا أيها العالم القاسي؟ لماذا؟

وهي خارجة من المكتب خارج معاها وأنا ببص للدكتور اللي باصصلي وبيبتسم وعلى وشي حسرة مائة عام من الخذلان، اللي هو: "أنا وثقت فيك.. أنا سلمتك أمري وبرستيحي.. تعمل فيا كده؟ أمال الغريب يعمل إيبويه؟ يعمل إيبويه؟ يعمل إيبيبيبويه؟" وكنت خلاص هنزل على ركبتي والجمهور يقعد يصفق بس خرجت بما تبقي من

كرامتي، بتبصلي بقى وبتسبل لي وفرحانة وفي سيّة فخر كده بعد ما مدحها وقالتي:

- شكراً يا محمد.. أظن انه قالي كده بسبب انك وصيته عليا بس..
متشكرة.

- بصراحة بقى آه، هو قال لي همدحها عشانك بس.

وبوووووووم، كسفتها صح؟ صح؟ صح؟!

صدمة الدنيا على وشها بقى وكسرت البيت، بوم بوم بوم بوم، لأ
وخلتها تكرهه، عصفورين بحجر، أنا محدش يكسرني، هعههههههههه.

(5)

فكرت قيل كده الناس هتقول عنك إيه في جنازتك؟ طب بلاش، عمرك عملت حاجة كويسة مخصوص عشان تبقى حاجة كويسة تنقال عنك في جنازتك؟ طب بلاش، عمرك كنت بتعمل حاجة وقعدت تتخيل والناس بتبص عليها بعد ما انت تموت ومتخيل هيقولوا إيه؟ طب بلاش، عمرك فكرت في جنازتك أصلاً؟! أعوذ بالله ناس متعلقة بالدنيا أوي، وربنا لهتموت يا علي في يوم!

تخيل كام واحد اسمه علي بيقرأ الكلام دي دلوقتي واتخض، ما علينا.

بتخيل في جنازتي والناس قاعدين كده، وبالناس أقصد أمي وأبوي وأختي واتنين من صحابي عرفوا اني مُت عشان بقالي عشر أيام منزلتس حالة ع الواتساب بشتم في طائفة جديدة من الناس، عشان محدش بيكلمني كثير، هيعرفوا في الشغل بس أغلبهم هيقولوا: "أوف، أخيراً!"، طبعاً مش هيقولوها قصاد الناس وإلا هيتبهلوا لكن جوه عقلهم يعني.

ويمكن خالاتي بيحوا وعمي، والأعضاء القريبين من العيلة، ويحاولوا يفتكروا لي حاجة كويسة عشان يمدحوني بيها عشان محدش يقول الحاجة الوحشة على اللي مات، واللي هو (ليه؟)، ما نقول، ما هو مات مش هيتدايق خلاص، ما علينا.

وأختي تفتتح الحوار فنقول:

- كان..

عائزة تقول كان طيب بس عارفة ان الكذب حرام فتقول:

- كان.. والله.. هو.. واحشني محمد..

وأمي تشوف الإحراج ده فتحاول تصلح الوضع فتقول:

- كان..

وبردو تحاول تفكر في حاجة عدلة.

- ساعدني مرة في الغسيل..

وكله يبصلها.

- فصل لي اللبس الأبيض عن الأسود، الفلنات في حنة والبوكسرات في ناحية، كده.. كان ببساعد يعني..

وكله مستغرب من الموقف الغريب اللي هي عملته.

- هو مكانش ببساعد عموما بس هي المرة بتاعت البوكسرات دي بس، الله يرحمه.

وخالي يشوف الموقف المريب اللي أخته عملته فيحاول يصلح الوضع فيقول:

- هو بصراحة كان محترم.

وبعدين يفتكر اني كل ما كنت بروح عندهم بقعد أسب وألغن في كل
شيء في الحياة وبعدين أقعد أضحك وبعدين أقعد مع عياله أسب
وألغن فيهم وأمشي، فيقوم صاحب الكلام ثاني وقايل:

- الله يرحم الجميع.

وبعدين عمي يتدخل ويقول:

- بصوا، هو باذن الله ارتاح..

يقوم الكل رادد:

- وريح..

(6)

أنا ومراتي مخلفناش، لسه، ربنا يرزق الجميع، لكن.. لكن.. ركز،
بنتخانق بسبب العيال!

ERROR 404 مش كده؟! بالظبط! مش لاقين حاجة نتخانق
بسببها فبنتخانق على حاجة مش موجودة أصلًا!

لسه فاكّر المرة اللي كنا على شاطئ فيها بعيد عن الناس كده - عشان
محبش الشغل اللي بيحصل ده فبنقعد بعيبيد خالص وحدنا - فهي
بتقولي:

- تخيل عيالنا كده وهما رايحين يجروا بالأشترات بتاعتهم كده على
المياه ولايسين عواماتهم ومعاهم اللعب ورايحين يجروا على المياه،
مسم، ارزقنا يا رب.

- آآح.. والله حاجة جميلة وأنا بتخيلهم كده.

طبعًا أنا بكنب وبطبل، ولا جميلة ولا بتاع أنا مرعوب من فكرة
الأطفال أساسًا، انت شايف كمية الأطفال اللي بيطلعوا عندهم مشاكل
نفسية بسبب أهلهم؟ حوالي الكل، أنا شايف انها مسؤولة أنا مش قدها!
ولا هي، ولا 95% من اللي بيتجوزوا، فأنا مش جاهز ولا عايز
عيال وواخد بالي من نفسي بالعافية، بس بمشي الدنيا معاه يعني.

- آه والله، تخيل كده وهو جاي يا عيني خايف كده وبيقولك: "بابا بابا
أنا خايف من المياه" وتقعده تشرحله بقى و..

- ههههه.

- بتضحك على إيه؟

- أنا ابني لو خاف دي حاجة بتتاخد بالحزم مش بالطبطقة.

كشرت وبصتلي وقالت:

- حزم ازاي يعني؟ هتروح ترميه في المياه؟

اتعدلت كده وقلتلها:

- أيوة! لازم يتعلم يبقى راجل!

صدمة الدنيا على وشها بقي، انديرت تاني وبصت ناحية البحر تاني
وسكتت، أسكت أنا؟ ده بعينك وعينها.

- العيل لو اتعود على المياعة هيطلع طري.

- أنا مقلتش مياعة!

- وأنا مقلتش انك قلتي.

- بس تقصد يا محمد! يعني لو جالنا عيل هنتعد ترمط فيه عشان
تقول يطلع راجل؟! حرام عليك.

- أيوة عايز الواد يطلع راجل، لو متعودش يبقى راجل من البيت
هيتعلم من الغريب، الحياة هتمرمطه كده كده، يتعود على الشدة من
بدري بقي.

- انت عايز تربي ابننا بالشدة يا محمد؟!

- مهو مش طول الوقت، يعني بنشد ونرخي، وقت ما نحتاجها بس هنستخدمها.

ديرت وشها ناحية البحر تاني ولاحظت دموع بدأت تتكون في عنيتها وقالت:

- يمكن عشان كده ربنا مرزقناش بولاد يا محمد، عشان عارف انت هتعمل فيهم إيه.

- ويمكن عشان عارف انك هتطّلي عيال مايعة وهيتدمروا أما يكبروا ويتصدموا بالعالم اللي مش مدلعهم زيك.

بس يا سيدي، روحنا بعدها ومن ساعتها مرحناش مصيف تاني وكان يوم نكد النكد، بسبب إيه؟ أولادنا، اللي مجوش أصلاً!

تخيل لما نخلف! يا إلهي، ده احنا احتمال نتطلق أو نضرب بعض بالنار يوم تسمية ابننا الأول! يا معين يا رب، كل ده بسبب انها تخيلت عيالنا بييجروا بالأشترات ناحية البحر، درس النهاردة: متتخيلش عيالك يجرؤوا بالأشترات ناحية البحر، الموضوع هينتهي بخناق، ده اللي أنا فهمته، أديني قلناك.

(7)

وأنا على السرير، الساعة 2 صباحاً، وبـ"صباحاً" أقصد في العتمة،
مش فاهم بنتقال صباحاً ليه بس دي مش قصتنا دلوقتي، بحاول أنام
وحاضن مخدتي زي العيال الصغيرة لما بيريجوا في الحضانة وكل
واحد بيحضن لعبته، وبعدين.. بدون سابق إنذار.. عفلك يقوم خابطك
بـ:

- هو انت لو رجعت بالزمن وقتلت أبوك هنتولد؟

- عقلي، بقولك إيه! الصباح رباح.

- لأ بسأل يعني..

- لا متسألش.

- طب جاويني بس..

- وانت عايز تقتل أبويا ليه يا عم؟

- أنا مش عاوز أقتله بس بقول (لو)، فاهمني؟

- طب وانت عاوز تعرف ليه أصلاً؟ وإيه اللي هتستقاده؟

- مجرد فضول.

- طب نام، تصبح على خير.

وما دام اللي قلنله "تصبح على خير" مقالکش "وانت من أهله" اعرف
انه ناوي لسه يكمل كلام.

- هل هتقدر تموته أصلاً؟

- يا عم نام بقى! ينعل أم ده عقل!

- يسطا طب أنا عملت إيه؟!

- يسطا؟! في عقل يقول يسطا؟

- أنا آسف..

- كنت عاوز إيه هاه خلصنا خليني أجابك ونخلص.

بس عمرك ما هتخلص من أسئلته، هيخبطك بواحد ورا الثاني لو
سببته العملية مفتوحة وأسئلته مش هتخللص.

- طيب، جاهز؟

- اخلص!

- هو الأعمى بيحلم وبيشوف الحاجة عادي في الحلم؟

- أيوة عادي ما هو مش بيشوف في الحلم بعينيه، هو بيشوفها بعقله،
عينيه لو هتشوف هتشوف السقف أو الحيطه جنبه، فهمت؟

- أيوة بس لو بيحلم انه في الشارع مثلاً، هيشوف شارع وعريبات
وكده؟

- أيوة بيني ما قتللك بيشوف ب..

- طب ما هو ميعرفش شكلهم في الحقيقة أصلاً، عقله هيعرف شكل
الشارع عامل ازاي منين؟

في اللحظة دي بضرب نفسي بالجزمة اني برد على أسنلته المتخلفة
ويرجع أحاول أنام.

- ما انت لو رجعت بالزمن وقتلت أبوك هتيجي منين؟

- يووووووه، يا عم ارحمني بقا!

- جاوبلي ده بس وبعدها هسيبك.

- وعد؟

- وعد.

- هرجع بالزمن وأقتله؟

- آه.

- طب وأنا رجعت بالزمن ازاي أصلاً؟

- مش قصتنا، خليها لليلة بكرة دي، فرضنا رجعت وقتلته.

- طب وهقتل أبويا ليه أصلاً؟

- فرضاًاا.

- ما آه هتولد.. لأ ثواني مش هتولد ما أنا قتلته.

- متأكد؟

- لأ ثواني، لما قتلته كانت والدتي حملت فيا ولا لسه؟

- معرفش، هو أنا كنت هناك؟

- متعرفش ده إيه؟ ما أنا لو قتلته بعد ما أنا خلاص والدتي حملت فيا
خلاص حاجي عادي، إنما لو قتلته قبل ما والدتي تحمل فيا مش
هاجي.

- طيب فرضنا قبل ما والدتك تحمل، مش هتيجي؟

- أبوة.

- يعني مش هيكون عنده ولد، لأنك قتلته.

- مطبوظ.

- والولد ده مش هيرجع بالزمن لأنه متولدش أصلاً.

- لأ مهو مجاش.

- وما دام مجاش ومرجعش بالزمن فمش هيرجع يقتله، فالمفروض انه
عاش ومتقتلش، وبالتالي هيرجع بالزمن ويقتله.

في اللحظة دي بقعد أصرخ وهو كمان بيقعد يصرخ وبشوف نوافذ
الويندوز اتفتحت في كل حنة وعمالة تجيب ان السيستم حصل فيه
خطأ و (ERROR 404 (PAGE NOT FOUND) لحد ما
جسمي بيظفي ويحجب شاشة سودا وبيودوني للراجل ثاني يصلحني

لحد ما أرجع أحاول أنام طبيعي. اليوم اللي بعدها الساعة 1 بعد منتصف الليل ألاقية بيقلولي:

- بسست.. بسست.. بقولك..

- بقولك إيه! غيرنا الرامات بتاوتي برعمائة جنيه بسببك، مسمعش صوتك.

- طب بقولك..

- متقوليش!

- هو لو حطينا الحرياية قدام مراية.. هتغير لونها لإيه؟ ولا هنتحول لمراية؟

تشششششششششششش.

وده صوت الماتور وهو بيطفئ بعد ما اتحرق.



(8)

فاكر يوم لما رحنا أخطبها، من أجمل أيام حياتي، ربنا يخليها لي، دخلت البيت وكله مطبوط كل حاجة والشقة متنضفة وكل حاجة بتلمع فانت تعرف مباشرة ان البيت ده كان مزبلة وكان في خنازير بتجري في الصالة ونضفوه قبل ما تيجي مباشرة، عشان مفيش بيت بيلمع كده، ولو كان طبيعي كانوا سابوه على ما كان عليه، ما علينا.

البيت بيلمع وكل حاجة متظبطة والناس متشيكة ولولولولولي من بنت اللذين قريبتهم الزياطة اللي لحد النهاردة مبطيقهاش وولية ربنا يحفظك، دخلنا وقعدنا وأبويا قعد جنبي وكلهم مركزين عليك بقى والنسوان أو (السنات) قاعدين يجيبوك من فوقك لتحتك وبيقولوا في نفسهن: "هو ده اللي البيت ميتة عليه؟!"، تحس كده في نظراتهن، أيوة يا ماما هو ده، أيوة يا شبيهة سمكة التونة، هو اللي قاعد قصادك ده وهيتف على وشك بعد دقيقتين بالطبط، 120 ثانية وهتلاقي وشك غرقان.

قعدنا بقى نتفق على كل حاجة وبتاع وبعدين في ناس مشيت وناس قعدت وأبويا قعد على جنب مع خالها وأمها قالت لو عاوزين تقعدوا مع بعض شوية أقعدوا بقى.

قعدنا مع بعض كده على مرأى من الكل بردو وهي بردو معلىش يعني مهما كانت أي بنت صادقة وبتاع بتقعد تتدلع شوية فترة الخطوبة وتمثل شويتين، وأنا كنت عارف ده بس سايبها تعيش الدور، عارف ان الصوت الواطي ده والرقعة و (لو سمحتي يا ماما) و(متشكرة)

بتتحول لـ(اللي هيقرب من الكوكا كولاع اللي جبتها هفرشحه! فاهمين ولا لا!!!!!!؟!)، أنا عارف، بس سايبها تمثّل براحتها وتعيش جو باربي ده.

جينا في مرة قاعدين بنتكلم بعد كام شهر كده فبقولها الحالة المادية صعبة شوية وبتاع وبعمل اللي بقدر عليه.

- آه بس الشقة أغلبها خلص صح؟

- امممم.. هو الصالون بس اللي خلص.

- نعم؟! انت مش قلنتي الشهر اللي فات هيكون كله خالص ما عدا الصلاة بس؟!!

عارف الشخصية بتاعت (الكوكا كولالا!!!!ع يا ولاد الـ..)، طلعت 10% منها واحنا قاعدين.

- ماشي بس الحاجة طلعت أعلى بكثير مما توقعت، والصنابعية بياخدوا مصاريف كثير أوي.

- طب وبعدين بقى إن شاء الله؟

عارف أكثر حاجة بكرهها إيه؟ هو اللي لسه حاصل ده، القلبان المفاجئ ده، لأ وعلى حاجة مش بايدي، فبصراحة اتدايقت..

- هعمل إيه يعني يا منى؟! هذب الأرض هجيب فلوس؟! ما بقولك الفلوس بتخلص وماشى واحدة واحدة!

- آه ونتجوز بعد 100 سنة بقى!

نتجوز إيه يا بنت اللذين بقولك الفلوس بتخلص معايا وانتى كل همك هنتجوز إمتى؟ أنا بقيت بعيد التفكير في جوازي بيكي أصلًا ينعل أبو النكد.

- لأ هسرق بنك حاضر، أجيب منيين؟!!

- طيب بيقى متقوليش بقى شهر وما شهر وترجع تقول معيش.

- انتى همك على ميعاد الجواز أكثر ما همك عليا؟!!

- ازاي يعني؟ هو أنا هتجوز مين؟

- طيب أصل مسروعة أوي على معاد الجواز ومش فارق معاكى انى بعانى من ضغوطات مادية دلوقتى!!

- أنا معرفة كل الناس وكل صاحباتى ان فرحى السنة دى! أعمل إيه دلوقتى والسنة فاضل فيها شهرين؟

- نعم؟!!

أنا فى اللحظة دى كنت هقوم أمشى وأقولها انتى من طريق وأنا من طريق يا بنت الحلال، فعلا، أنا ممكن أرمى أى شىء فى لحظة واحدة لو شفته بينهار، الهانم همها انها تتقشخر قدام صاحباتها انها اتجوزت أكثر ما همها الحمار اللى فى الساقية ده حياته حاصل فيها إيه أصلا، مسكنا فى بعض بعدها بقى وادتهمها.

أمها بقى جت وقعدت تهدينا وقعدت أنا مع حماتى وشرحتلها ووقفت فى صفى تماما وقاللتى "فعلا هو انت هتعمل إيه يعنى؟ ما اللى تقدر عليه"، لازم تطبل لى طبعًا عشان ملغيش أم الحوار وتخلص من

بنتها، بعد ما مشيت أنا وأبويأ قعدت بتاع شهر مكلماش، وكنت متأكد ان أمها في الشهر ده كانت بتولع نار تحتها وتجلدها بالكرابيج على تطفيشي.

ما أمها كانت مسروعة رخرة زيها على الجواز، عالم عندها نقص، المهم، رجعت بعدها كلمنتي وإنسانة تانية، مش عارف عملتها إعادة تأهيل ولا إعادة ضبط المصنع ولا بدلتها بروبوت ولا إيه، بس منى اللي حبتها ببلاويها دي بقت أحسن ألف مرة، وده شجعني اني أخلص كل حاجة ونوصل لميعاد الفرحة قريب، طبعا على حسب إمكانياتي، وطبعا خلال الشهر ده كنت بجهز الشقة بردو ويقول سواء كملنا أو مكلناش هي كده كده الشقة بناعتي، أعيش فيها معاها أو مع غيرها.

ولحد النهاردة كل ما أكلم مراتي في الحوار ده تتحاشي اللي حصل في الشهر ده، تكونش أمها قتلتها ودفنتها في أي حنة واللي أنا عايش معاها دي أخت توأم ليها ولا حاجة بس عدلة عنها شوية؟ أنا منمنتش بقالي ثلاث أيام وشكلي بدأت أهلوس، أشوفك بعدين، سلام.

(9)

أنا كنت وأنا صغير متعلق بالكرتونات لدرجة رهيبة، لدرجة رهييبة! فوق ما تتصور. حياتي كانت هي الكرتون، كنت مهووس، كان نفسي ألاقي عيل متخلف زي ونقعد نتكلم زي شخصيات الكرتون كده.

- مرحبًا يا صديقي، هل تريد اللعب؟

- نعم يا صديقي العزيز، هيا بنا!!!.

لو شفت دلوقتي عيلين بيتكلموا كده طاخ وبكف إيدي على أورة كل واحد منهم عشان يتظبطوا.

وصلت بيا اني أول ما جالي تليفون وأنا مش عارف في إعدادي ولا إيه ولا مش فاكر إمتا، بقيت بتفرج على الكرتون وأول ما تيجي أغنية متخلفة من بنوع: "نحن رائعون والحياة حلوة يمينا بالله" على التليفزيون كنت أقوم جري وأبدأ التسجيل في التليفون وأسطلها وأحطها نغمة، أبها البانانس التعيس الخرب! وأنا شايف العيال اليوميين دول الواد ثلاث سنين وعنده آيباد، يا ابن اللذين ده أنا مسكت التاتش في ثانوي! وأنا مواليد 95 يعني مش مواليد 1987 ولا حاجة، يا ولاد اللذين.. بفتكر نفسي وإحساس الإنجاز وأنا بعد ما سجلت أغنية الكرتون كاملة من غير ما أمي تزعق بعلو صوتها من المطبخ:

- عاوز الكوسة أكثر ولا الفلفل في المحشي يا حمادة؟

وأنا أوقف التسجيل وأبقى عامل زي المخرج وهو يقول: "CUT"
بعد ما ممثل يبوظ المشهد في آخر حنة.

- مش عاوز خالص يا أمي، اقتليني!

- إيه ده في إيه؟ طيب متعيطش بقى لما الأكل يتعمل، يمينا بالله ما
هندوقه.

- طب بوظتي أم الأغنية طاه!

المشكلة في الذل بعدها وأنا رايح والأكل محطوط عامل نفسي عيبط
وعمال أبص كده.

- آاا.. الكوسة دي من أم 4؟

- نعم عايز إيه؟

- بشوف بس مستوى الكوسة والأسعار وكده، وربني كده الفللة دي
لما أقيمها كده.

- شيل إيدك!

بس كانت بتخليني أكل في الآخر، أم بقى، ودلوقتي عيل لابس
البامبرز ماسك التلفون بيتقرج على فيديو على اليوتيوب ويكتب في
التعليقات "اخمي تيارميطحور"، آاا اخ يا ولاد..

فاكر بردو حاجة كانت قالبة حياتي من ساعة ما سمعتها احد دلوقتي،
فاكرين شخصية السلحفاة اللي كانت في نيمو؟ الراجل المتطوح اللي
تحس انه شارب 40 بيرة قبل تمثيل المشهد ده، قال جملة عظيمة،

قال: "ودّع الأحران يا ذوق"، والثاني كان ابنه تايه في المحيط ومخطوف ومش لاقيه، كمية الإيجابية اللي عنده، جملة عظيمة أوي، أي نعم محدش هيعيش من غير أحران، لكن لطالما الجملة دي ساعدتني جدًّا، كنت حتى حاططها غلاف على موقع من المواقع، دايمًا الجملة دي بتريحني، فيها طاقة حلوة كده، فهنهي الفصل ده بيها حبًّا فيها، "ودع الأحران يا ذوق"، وبعدها إيموجي قلب، عشان معرفش أحط إيموجي في كتاب، عشان الملف بيبقى.. يوه خلاص خلصنا الفصل! أشوفك في اللي جاي، سلام مؤقت.



(10)

بص، واحدة واحدة كده وبالهداوة، مش أم المترو فيه عربيات رجالة
وعربيات ستات؟ (أيوة يا أستاذ محمد) حلو يا أستاذ قارئ وأستاذة
قارئة، ألاقي بقى ليبيبيبييه سوسن وتقيدة وخلود داخلين يجروا في
عربية الرجالة كأنها الورث اللي الوالد سايبهولهم؟ ممكن حد يفهمني؟
لأ وأنا اللي المفروض أقوم عشانهم، أنا! اللي ماشي على النظام،
أقف، وهي تقعد وهي مخالفة أم النظام.

راجع مرة من الشغل مهدود ومش قالدر، ومنى قايلالي انها عاملة
محشي وأنا خلاص هعيط عشان أوصل بسرعة ولفيت بتاع أربع
مشاوير في اليوم ده وماشي ناحية محطة المترو حاسس بسقعة في
رجلي كده من الوجع واللي هو عارف لما تحس ان رجلك الدم سقع
فيها من كتر الوجع وبتترعش كده؟ مقولكش بقى، قعدت على
الرصيف دقيقة بالظبط وقمت كملت مشي للمحطة عشان عاوز أروح
للمحشااااي.

دخلت، حظيت شنطتي على المكنة وانقتشت والراجل بصلي كده، مش
عارف هو شاف ان فيها ألعاب أطفال ولا إيه، أصلي باخد معايا
ساعات لعب وأنا رايح الشغل عشان أعب في البريك، المهم، هو أنا
بقولك ليه؟!

قطعت التذكرة اللي سعرها اتضرب في 5 لسبب ما وهوب في ثانية
كنت على رصيف قطر العالم السفلي ده، وكل مرة أطلع أو أنزل على
سلم أقعد أتسابق مع حد كالعادة.

فضلت بتاع ثلاث دقايق رجلي بدأت تلسعني تاني وكنت هقعده بس
قلت لو قعدت هتاخر أكثر وكل ده منى تكلمني كل شوية:

- مجتئش ليه لسه؟ هاه؟ فاضل كثير؟ هاه؟ هنتاخر؟ طب انت فين؟

والشغل اللي يجبلك رغبات انتحارية ده.

جه المترو! اللهم لك الحمد! يا فرج الله! بس عينك ما تشوف إلا النور،
يا ريته خيطني قبل ما أشوف المنظر ده، بتاع 30 ألف إنسان في كل
متر! أربع عربيات يشيلوا الشعب الصيني كله، أمم الأرض كلها في
المترو، مكنتش هستغرب لو لقيت حيوانات طالعة من جوه، مترو ده
ولا سفينة سيدنا نوح؟ آلاف البشر اندفعوا من الباب لما اتفتح، ده أنا
سمعت لهجات وصريخ وشتايم، ده كان في ناس عايشة جوه فترة،
كان في واحد طالع بالعربية مع العيلة، دي باخرة! خرج بتاع 30 ألف
واحد ولسه في 710 ألف جوه، طبعا هخش فين؟ قلت يمكن العربية
دي بس، ببص كده هنا وهنا وكل عربيات الرجالة مليانة، وهوب..
لقتها، عربية الأحلام! عربية ستات جنب بتاعت الرجالة على طول اللي
هو أول واحدة مش زحمة أوي، شاورت نفسي، ضربت بعيني على
اليمين وعيني جت على البوستر اللي محطوط بيقول: "غرامة ركوب
رجل في سيارة السيدات 100 جنيه! سامع يا متحرش يا نجس؟" قلت
ما هما بيركبوا عربياتنا يلا فوضى فوضى بقي، وبعدين هو بيكلم
المتحرشين، أنا راجل محترم، هركب.. ولا.. ولا بلاش؟

بس طبعاً لأن كل نجاح عظيم ثمنه غالي.. خبّطت في واحدة ست،
وعينك ما تشوف إلا النور، فيلم زومبي قفزوا عليها قفزة رجل واحد -
أو بالأحرى ست واحدة- بعد ما الباب قفل وبدؤوا ينهشوا في لحمي،
كان الرجال الذين يقفون في الخارج ينتظرون منذ أدهر عربة فارغة
ينظرون إلى بشفقة..

- لماذا يا بني؟ لماذا؟ أما استطعت الانتظار؟

هؤلاء الرجال الوسيمون الذين ينتظرون هنا منذ صيف 1947.

- لماذا يا ولدي؟

مسكوني بقى:

- انت إيه السفالة دي؟! انت متربتش؟! ابعده!

يا ولية أنا جيت ناحيتك؟ ده دي مش اللي خبّطتها دي واحدة قاعدة
بابنها ما صدقت لقت حاجة مثيرة للاهتمام تحصل في حياتها البائسة
عشان تزيط.

- قمة قلة الذوق بصراحة!

ودي واحدة واقفة في نص العربية كده ووالله لو كنت متحرش ما كنت
تحرشت بيها، دي لو هي نزلت ودخلت عربية الرجالة كانوا هيروحوا
يركبوا ميكروباصات، بتقولك:

- مش فاهمة إيه السرعة اللي عند الرجالة ده!

لسه هرد لقيت ست عجوزة بتقوللي:

- عندك اخوات بيني؟

لسه هرد لقيت البومة الثانية:

- حاجة غريبة.. أول مرة يشوفوا ستات..

- وهو انت ستات يا أخ!! انت مالك انت بالكلام ده؟

وعيبينك ما تشوف إلا النور، المترو تحول لحديقة حيوان، الناس في الشارع واقفين يتفرجوا على إناث الأسد عندما تحاول أن تقترس الأسد الوحيد الجائع المتشوق للمحشي في منزله العزيز مع زوجته العصفورة الحنون، بعيدا عن هؤلاء الهمج.

- النظاااااااااا! اهدوا يا جماعة.

دي تقريبا مأمورة السجن بتاعت عربية نمرة واحد عنبر المجانين دي.

- انت يا أخ.. انت شكلك محترم.

- الـ.. الله يـ.. الله يخليكي..

وبعدين قالتلي وهي بتمد ايديها وتضطبط ياقة القميص اللي بهدلوها وبهدلوني.

- عربية الرجالة لإيه؟

- للـ.. للرجالة حضرتك..

قامت شادة الياقة كده وقالتلي:

- وعربية الستات؟

- للـ.. للستات..

- عربية الستات..

وقامت شددت الياقة بعنف كده وقالتي:

- للستات، مفهوم؟

وأنا وأنا برد زي الكلب اللي هوشته بطوبة فلزق راسه في الأرض
كده:

- م.. م.. مفهوم حضرتك..

- تمام، خلاص يا بنات، كملوا حياتكم عادي.

بنات؟ ده أنا لو داخل بتنين كان عملها على نفسه، آه يا مناققات.

المترو بدأ بيبطأ ووصل المحطة وأنا عاوز أكسر إزاز الباب وأنط،
وصلنا المحطة وكل واحدة كملت تمثيلها للرقة والمترو بيبطأ بيبطأ
بيبطأ وأول ما فتح كنت أنا في الشارع خلاص من كتر السرعة،
طلعت أجري بسرعة كوستاكو دي فاسو نفسه عمره في حياته ما سمع
عنها.

وصلت بيتي، دخلت خايف وبترعش، مراتي بتمد إيديها عشان
تحضنني فقلت كاشش كده وحاطط إيديا قدام وشي فقالتي:

- هههه، إيه ده في إيه؟ انت اتجننت؟

قعدت أشرحلها بقى وهي حاطة إديها على بوقها ومش مصدقة، بعد ما خلصت قالتلي:

- مش ممكن.. أنا مش مصدقة وداني.. ازاي تقول على الست بومة يا محمد؟! مش فاهمك بصراحة.. مفيش أي احترام للسنت؟!!

هو أنا اتجوزت ليه؟ حد يفكرني كده!

(11)

أذنت العشاء منذ خمس دقائق، انتهت مشاويري، أنهيت عملي التعيس كموظف خدمة عملاء تعس بائس يضطر للتعامل مع الأغبياء والحمقى وتحملهم لجل لقمة عيشه، في طريقي للمترو، اشتريت كوزاً من الذرة المشوية لأستمتع به مع كيس السوبيا اللذيذ الذي أعشقه منذ طفولتي ولا أستغني عنه، دخلت محطة المترو، نظر إلي المسؤول عن جهاز التفتيش باستحار عندما رأى دمية (باط يطير) في الشنطة، طب افرض جايبها لابني! ده انت غريب أوي!!

توجهت لعربة الرجال هذه المرة، أفيال تتطلق من الداخل وزرافات والكثير من الأسود والنمور، وبعض الحيتان والقروش، خرج الجميع ودخلت أنا.

وقفت كالكلب ممسكاً بما تبقى من مكان في الحديدة التعسة التي نمسك بها بقوة خوفاً من الانكفاء كالحمقى على وجوهنا، تظل ممسكاً بها حتى ينسحب الدم من عروق يدك وتشعر بنفس الشعور الذي شعرت به عندما كان المعلم يعاقبك برفع يديك لأنك ناديت زميلتك هدى (بال)تتحة). ظللت واقفاً أندب حظي حتى رأيت الجالس على الكرسي الذي أقف أمامه يستعد للقيام..

هل ما أراه حقيقة؟ هل سيقوم هذا الشاب العظيم الرائع ذو السماعات المبالغ في حجمها والملابس التي تصرخ فائلة (أنا روش وعندي 22 سنة وهعيش حياتي، لاي لا لاي لاي لاي)، فرصة! فرصة ذهبية،

- يا إلهي.. يا إلهي ماذا يحدث؟! إنها تقترب منه وهو بدأ يرتعش في مقعده من الخوف، ماذا ستفعل؟ هل ستجذبه من ياقته من جديد؟!

وقفت أمامي بالضبط ثم سكنت مكانها، وكأنها تنتظر شيئاً ما ليحدث..

- ما تقوم بيني تخلي الست تقعد! ده إيه الجيل ده بس يخواتي!

نظرت إلى جانبي فرأيت المتحدث رجل تخطى الثمانين عاماً.

- يا حاج طب وأنا مالي؟!

- انت مالك؟! انت قليل الذوق ياد؟!

وكله بقى قعد يبهدل فيا عشان أولاً مقممش للسيدة الأولى اللي واقفة هنا ثانياً عشان رديت على الراجل الحاج.

- ما تقوم يا أخ!

بصيت حواليا لقيت محدش قاعد غير العواجيز والستات، تذكرت سفينة تيتانيك..

- مرالكب النجاة هنا، النساء والعجزة والأطفالال.

- طب وأنا؟

- النساء والعجزة، من هنا رجاء.

- طب وأنا أنا؟ أموت؟

- النساء من ناحية اليمين، والعجزة والأطفال من ناحية اليسار.

- يا حاج..

- على الجميع ارتداء سترات النجااة.

- ما أنا روح بردك.

- انت عارف ياد لو مسكتتش؟!!

حينها قفزت من التينانيك، كلكم هتغرقوا كده كده، مش هينجو غير
البت أم شعر أحمر عشان حلوة شويتين، عالم أنثوي.

الناس فضلوا يمرطوا فيا عشان ارتكبت جريمة القعاد وفي ست
واقفة.

- يا إخواننا انتوا مش فاهمين، أنا لما ركبت عربية الستات كانت بـ..

كله بصلي بنظرات هلع واستحغار.

- عربية الستات؟ أعوذ بالله!

- متحرش؟!!

متهيألي حكييت ما فيه الكفاية، قمت وهي قعدت ومن يومياها بركب
أنوبيسات وميكروباصات، وجيس وات، بقيت بردو بقوم للستات، مش
عايزين الست زي الراجل؟ اقفى!

(12)

بص يا سيدي، مراتي واقفة مع صاحبتي اللي عندها حضانة قريبة
مننا وبتتكلم معاها، قالتلي هنعدي عليها قبل ما ننزل نشترى الحاجات
من وسط البلد، أنا كنت مصمم نروح السبتية بس هي ركبت دماغها،
المهم، واقفين يهروا ومش عارف قالتها إيه فمراتي جت بتقولي:

- بقولك إيه، اقعد هنا وثانية هطلع أنا وسماح بس بيتها ثانية هتوريني
حاجة وننزل.

- طب احنا خارجين يا منى مش وقته! لما نيجي روحيلها وهروح
البيت أنا.

- يا حبيبي دقيقة والله.

- دقيقة ازاي يعني يا منى؟ هتوريكي بيتها في التليفون؟ ما لسه طلوع
ونزول ورغي ما انتوا الاتنين جعانين رغي!

- كان زمني طلعت يا محمد بقي..

- اخلصي!

راحوا وطلعوا فرحانين زي الهُبل مش فاهم هتفرجها على إيه طارئ
أوي يعني كده عشان الرجل الجنتل يقعد في الحضانة يستناهما.

دخلت الحضانة جوه ودوشة وبتاع وقعدت على المكتب بتاع الأخت
بقلب في تليفوني وبشوف الرسائل وبتاع الأفيلاك:

- عمو..

ببص كده لقيت عيل ببربور بيقولي:

-م.. محمود.. محمود عضني في دراعي..

- بيني طب وأنا مالي؟! غور يلا امشي!

- يا عمو يعني أضربه؟!!

قمت قايم وماسك الواد من ياقته وقتله:

- وأنا مال أمي يلا؟! انت تعرفني يااض؟!!

قام الواد طلع يجري.

شوية وسمعت صريخ من الأوضة الحقيبة اللي جوه اللي فيها ألوان
ممكّن تجبلك عمى ألوان بمجرد الدخول.

لسه داخل قام كله سكت وتتح لما شافوا بقى راجل لأول مرة. العيال
فضلت متتحة بقى ووااو راجل، تخيلتهم بيقولوا في عقلم:

- ده شيهنا! هو الكائن ده بياكل إيه؟

انتوا بيني عايشين هنا ولا إيه؟ هما رامينكم هنا 24 ساعة؟

المهم ما علينا الحيطان كلها عليها كمية رسومات أطفال بشعة وألوان
وقوس قزح وحاجة تموع النفس، فين صور الجماجم وعلامات الإكس
الحمرا؟ ما علينا.

- ع.. ع.. عمو..

بصتلله كده فقرب مني ومسك في رجلي - مش فاهم ليه - وقالى:

- ع.. ع.. علي ك.. كان بيضرب أسر..

- انت بتدلني بيني عشان تتطق الكلمة؟

الواد فضل باصصلي وساكت وأكاد أقسم اني شفت على أورته رسالة
الويندوز بتاعت الـ **ERROR**، فعرفت انه مش فاهمني، فبصيت
للتانيين - والواد لسه ماسك في رجلي - وزعت فيهم قايل:

- مش عايز دوشة هنا! مفهوم؟

محدث اتحرك وكله فاتح بوقه، تخيلت انهم مش شايفيني زي ما أنا
شايفهم، شايفين ديناصور عمال يزجر في وشهم ومش فاهمين
كلامه.

حسيت بالقوة بقى وأنا عامل هيبية في المكان كده فرجعت مكاني
وقعدت باشا، بكمل تقليب في الرسايل الأقي ست عيون بترمقني من
بعيد، كإن سنايبر مستتيك تثبت عشان يضع رصاصته في نصف
جمجمتك.

بنئين وولد، مادين راسهم من عند الباب بيتجسوا عليا، الخونة..

- عايزين ابييه!!

كله دخل يجري.

امم.. حلو الجو ده، حاسس نفسي ملك.

المهم قعدت أشخط في العيال وأحس بقوتي عليهم شوية بدل ما أنا
متداس عليا في البيت لحد ما مراتي نازلة مع صاحبتها وعمالين
يضحكوا وجتلي الست:

- العيال عملوا معاك إيه؟

- ملايكة.

- طب جميل، أنا مش سامعة صوت خالص شكهم ناموا.

- آها، يمكن.

- متشكرة يا أستاذ محمد.

- ولا يهكم، يلا بينا يا منى؟

- يلا يا حبيبي.

خرجنا من الحضانة وماشي أنا ومراتي وأول ما خرجنا من باب
العمارة سمعنا صاحبتها بتزعق:

- إيه ده!!

وقفنا لقيناها جاية ناحيتي وبتقولي:

- هو إيه اللي حصل؟
- إيه اللي حصل مش فاهم؟
- ليه كل الأولاد بناطيلهم مبلولة؟!

(13)

البطالة، العطالة، فإكر قيل ما نشتغل أنا وحمزة لما كنا بنلف على كل مبنى على ظهر الكوكب بندور على أي واحد بيبيع مناديل حتى يشغلنا معاه.

- آخر الشارع ده على الشمال أهو.

- المبنى الكبير الإزاز ده؟!!

- أيوة.

- أوبال!!! العبي يا دولارات بقى!

- خش بقى بشخصيتك الجربوعة دي وهنترفض احنا الاتنين.

- حمزة! لم نفسك، وبعدين أنا هبهرهم بالإنجليشي بتاعي لا تقلق.

- إنجليشي؟

دخلنا وبتاع الأمن بصلنا بقرف فقلنا له - أو حمزة قال له:-

- طالعين لأستاذ عادل الدور الرابع، تقديم للشغل.

قام الرجال بصلي من فوق لتحت وتحتي كده فحمزة قال له:

- معايا.

الراجل قام وهو قرفان ومشينا وراه، "معايا" يا حمزة؟ يا حمزة؟
هو أنا السواق بتاعك؟ مش فاهم ليه كل ما بنزل معاك بتحسني اني
الروت وايلر بتاعك بتفسحه! ليه الاستحجار ده؟!

الراجل وصلنا للأسانسير ودخلنا وداس على الزرار ورجع وفضل
يبصلي بقررف مبالغ فيه لدرجة حسيت انه هيرجع خلاص، يعم
هو أنا وشي متغطي بالترجيع؟ ما تظبط كده!

طالعين وحمزة عمال يظبط بدلتة وشعره في المراية وأنا بتأكد ان
الكروكس مثلمع كويس، قمت طلعت مندبل معايا ونضفت بيه
الكروكس، هو أي نعم كان منفوف فيه بس حلو بردو عشان يلَمَع.

- أهلا بحضرتك!

واحدة واقفة مباشرة قدام الأسانسير استقبلتنا، هما كانوا مراقبيننا ولا
إيه؟ واحدة شبه المضيفات كده أو الستات اللي شغالين في الـ FBI،
حاجة أبهة.

دخلنا قاعة اجتماعات كده ضخمة زي بتاعت الأفلام وكان في ثلاثة
قاعدتين من كتر نضاقتهم وأبهتهم كنت هلف وأطلع أجري، حسيت اني
هتقتل جوه.

رفعت الشورت بتاعي ودخلت وهما بقى ترحيب مش ممكن ما عدا
الكبير بتاعهم كان باصصلي بكمية قرف خلاص كنت باصص على
بوقه عشان أشوف هيرجع بجد ولا لأ.

هتقولني عرفت ازاي انه الكبير بتاعهم هقولك كان قاعد على الكرسي
اللي في الوش اللي بالطول على الترايبزة ده، والاتنين التانيين كانوا
قاعدين يمينه وشماله، راجل شبه روبرت دي نيرو كده، المهم.

- مين الولد ده؟

آااه بدأنا، عنصرية، ساب حمزة ومركز معايا أنا!

- ده مقدم للشغل عندنا؟!!

الاتنين اللي جنبه قالوله حاجة فسكت وقال:

- اتفضلوا اقعدهوا طيب.

أنا وحمزة كنا باصين لبعض والخوف كان باين على وشي وبعدين
رحنا نقعد وهو قال لنا:

- تشربوا ايه يا أساتذة.

حمزة قال له:

- ولا أي حاجة يا أفندم تسلم.

- سحلب يا ريت سكر زيادة.

الراجل بصل لي بقرف وقام مزعق:

- امشي ياد اطلع برا يلا!

- ليه بس كده حضرتك طااه!!

اللي جنبه سكتوه وقام معاهم برا يكلموه وحمزة قال لي:

- انت بتهزر يا محمد؟!!

- يا عم ما هو سأل تشربو ايه!

- سحلب؟! انت قاعد عند أمك؟!!

- حمزة اتكلم كويس لاحسن يمين بالله بضهر ايدي وعلى وشك!

- يا عم اقعد بقى.

شوية ودخلت بنت كده فقلتلها:

- السحلب لو سمحتي.

بصتلتي بعدم فهم كده فحمزة عملها إشارة اللي هي بتاعت (مجنون)
فألبت خرجت.

- محمد وبعدين؟! وبعدين تقول مبنشغلش ليه؟ حرام عليك يا أخي
هتضيعها علينا!

شوية والراجل دخل مع الاتنين التانيين ودخل مش باصص قدامه إنما
عينه ضاربة في عيني والقرف اللي كان بيص بيه اتضرب في مائة
ألف.

حمزة همس لي في ودني:

- واقلع أم نضارة الشمس دي احنا مش قاعدين على الشاطيء.

- مدياني برسنيج..

- محمد، لأمش مدياك برسنيج ولا خرا، لو سمحت اقلعها.

- عاوز تبوظ عليا الشغلانة وتاخذها انت، احقد احقد..

الراجل أول ما قعد قام مزعق:

- مش فاهم أنا أم الغباء ده! نضارة شمس جوه المبني يا أخ؟ وشورت
وكروكس؟! أنت مجنون بيني!؟

أنا كل ده مصعوق من قلة الذوق بتاعته لحد ما شخط على آخره واللي
جنبه بيهوده وهو بيقول:

- وداري أم شعر صدرك ده! قميص مفتوح؟! بيني هما قالواك انك
هتشتغل على شاطئ؟! ده بنك محترم بيني!

حمزة كان مرعوب بقى وقام شادد النضارة من على وشي وقام
باصصله وقايل:

- احنا أسفين جدًا يا أفندم والله، هو بيحب يهزر بس.

- هزار إيه بس وزفت إيه بيني انت وهو، ده شغل! من أولها كده؟

- أسفين يا أفندم.

- اتفضل يا ابني، انت اسمك إيه؟

- حمزة حضرتك، حمزة محمود عبد السميع.

- والأخ؟

- محمد يا باشا.

- محمد إيه؟ ملكش أب؟ لقيط؟! مجهول النسب؟

- الله الله الله الله! ده احنا جايين نتهزق بقى يا إخواننا! انت رجل متربش!

مسكنتلوش بقى، مسكنا في بعض وأنا حمزة يشدني وهما زمايله
يشدوه لحد ما طلعهو برا وسابوه برا وهو عمال يشتم في الحاجة أمي
وأنا ساكت ودخلوا هما.

- ممكن حضرتك نلتزم بالآداب بس لحد نهاية الإنترنت؟

- إيه البريفيو ده؟

- الإنترنت اللي هو المقابلة حضرتك، اللي احنا فيها دلوقتي دي.

- أيوة أيوة أنا اتلغبطت بس، أنا جامد جدًّا في الإنجليزي على فكرة!
محصلتس.

- حضرتك تقصد الإنجلش؟

- أيوة هو ده.

- طيب حضرتك تعرف تعمل conversation بالإنجلش؟

- شووور شووور، اخبطني يلا بالكلام هتلاقيني بلاغيك عادي.

- طيب يا أفندم، How are you today?
- the stuff is very good and this mother fucker i
.will kill him
- لأ حضرتك مينفعش كده!
- لأ بقولك، أنا محصلتش في الإنجلز.
- ماشي يا أفندم، و حضرتك؟
- حمزة محمود عبد السميع مواليد 1995 خريج كلية التجارة بامتياز
مع مرتبة الشرف.
- ممكن ورق حضرتك؟
- ممكن جدًا.
- عجبكم الإنجليش بتاعي؟
- أستاذ حمزة حضرتك اشتغلت في أي مكان قبل كده؟
- بتعلم من الأفلام بتاعت hands on the ground mother
fucker وكده.
- أستاذ محمد، ممكن حضرتك تنتظر بس لحد ما نخلص مع أستاذ
حمزة؟
- يعني هو أستاذ حمزة ابن تسعة وأنا ابن *****؟

- الراجل بص حواليه كإنه عايز يخبطني بحاجة فسكتت.
- لأ حضرتك مشتغلتنش في أي حاجة متعلقة بشهادتي قبل كده.
- طب أي شغلانة خالص؟ حتى لو غير متعلقة بالشهادة.
- آه اشتغلت في.. محل.. أكل.
- ما تقولهم انك اشتغلت عند موسى!
- محمد!
- كان شغال في محل فول وطعمية حضرتك! وكان بيسرق المخمل!
- ممكن حضرتك تصبر يا أستاذ محمد لحد ما نخلص معاه وتخليه هو يرد؟
- ماشي يا ننوس، حلو شغل الكوسة ده، عشان لايس بدلة يعني؟
- احم.. طيب، أستاذ حمزة هو ال..
- كان عندي بدلة على فكرة، بتاعت جوازي، بس مش لازم يعني ألبس زي ما كله بيلبس، ضروري أكون creative!
- سمعت وقتها زعيق شديد برا والراجل فتح الباب وهو معاه عصاية والناس ماسكينه ودخل يضربني، سكتت له؟ بعينك، قلعت الكروكس وحذفته عليه، زاط بقى وهاج وعايز يموتني.
- بس يا سيدي ، حمزة متعين من يومها في البنك ورموني أنا برا البنك أستاذاه برا، هتقولي ليه هو يشتغل وانت لأ؟

كوسة! واسطة عشان عمه كان شغال في بنك، هو آي نعم كان بنك
تاني بس كلها مفتحة على بعضها، بلد وسايط!

(14)

هااااح.. أيام ثانوي، فاكرك؟ لو انت بتقرا وانت في ثانوي قلبي معاك، هتخلص جامعة وتقول: "هاااح.. أيام ثانوي"، هي أيام تعيسة يعني متفرحش أوي، الحلو قدام اصبر بس.

فاكر لما كنت في ثانوي ويختااااي، كنت عيل ملزق بشكل، مقولكش، بص هحكيلك وأوريك كنت ملزق أد إيه؟

السماعات محطوة طول الوقت وبسمع عمرو دياب وتامر حسني وتامر عاشور ورامي صبري وهكذا دواليك، وعمال أتخيل نفسي وأنا مع حبيبتى وبغنيها الكلام ده بقى وطالعين نجري في حقول الذرة وهكذا، أنا أي نعم كنت سنجل بس ده ميمنعش اني بتخيل.

عيل ملزق بقى وسشوارات وروشنة لآخر حد، أي نعم لسه بتروشن بس مش زي وقتها، كنت ملللق، لو كنت خبطت في حيطة كانوا هيقعدوا يشيلوني من عليها بمية دافية ويشدوا من كتر ما كنت ملزق، كنت ملللق، وصلت ولا أقولها تاني؟ عشان اللي جاي ده متستغريش لما تسمعه عشان كنت شخصية ملزقة ماشي؟ اشطا.

رايح مدرستي الثانوي اللي كانت على شارع الهرم - ومحدث يتريق ولأ مكانش في رقاصات بيرحبوا بينا في الحوش - ورايح أركب العربية لقيت بنت بقى وياااااااا، مادونا، أمورة خالص وبغتي عليها كده عاملة زي الفلاولاية، فأنا قلت لنفسي: "سشوار، لبيس مدرسة متأفز، حظيت ماسك عند علاء الحلاق، جزمة متلمعة، خلاص البت

دي هخليها تتجزوني النهاردة، لا يمكن تقدر ترفض"، وكان عندي حق، كنت جامد على شاب في ثانوي لأن كثير منهم كانوا مآشفين، ومش بتكلم عليك يا حمزة لأ، فالبت كانت بتتكلم في التليفون وعمالة تضحك فأنا قلت: "ياااااس، هي أوريدي في وضع الضحك لأي حاجة هقولها هتضحكها على طول، وأنا أصلا كوميديان كبير فيلا بينا، دوس يا مدير"، قعدت أبصص شوية لحد ما عينها جت في عيني وهوب، في لمح البصر الابتسامة اللي كنت معتمد عليها تسهل المسألة اختفت.

أوبياااا.. غرزت في الطينة يا مدير..

ولا تكونشي انبهرت بجمالي لدرجة تتحت؟ ما هو الواحد في الفترة دي بيعرف جماله من الآخرين للأسف! هل أنا وحش لدرجة حاسة انها هترجع؟ ولا حلو لدرجة خلّتها تتحت وخلص التليفون هيقع من أيديها؟

وبعدين كمّلت كلام واديرت وكملت ضحك مع اللي بتكلمه ولا بتكلمها وغالبا بتقولهم "في متحرش بيصلي عاوز يسرقني ويغتصبني".

قلت طب نجرب تاني، مش فاكر قعدت أعمل إيه بالضبط بس قعدت أتروشن شوية، خلي بالك كل ده عمال اتأخر على المدرسة هاه؟

شوية وبتبص هنا وهنا وهوب، الجولة الثانية.

- عيناااهااا التقتا يا سالااااا، من سيفوز بقلب الفتاة اليووووم؟
محمممم أم كوستااa

والمرة دي ابتسمت. هي ثانية وكنت سامع عمرو دياب صوته بيرن في عقلي:

- ضحكت يعني قلبها مال وخلص الفرق ما بيننا اتشال، روح يا حبيبها ده انت حبيبها، قل لها كل اللي بيتقال.

طب يا عم عمرو افرض شايفة حاجة وراك بتضحك عليها ولا بتضحك على شكلك حتى، ولا اللي في التيفون بيضحكها، أو بتسمع كتابي مسموع وبتضحك على ده، أي واحدة هتضحكك هتروح تخطبها؟ ما علينا.

قلت بس خلاص، أنا اتجوزت النهاردة، كنت هكلم أمي عشان نحدد ميعاد الفرح بس قلت استنى لما لأغيبها كده، فرحت عديت الشارع ناحيتها، عشان هي كانت ناحية وأنا كنت ناحية، وأنا بعدي لقتها هي كمان بتعدي مكان ما أنا كنت، ساعتها عقلي قال لي:

- Stoooooop! وقّف يا مديبير.

- عايز إيه بس؟ مش وقتك!

- هي عدت ليه؟ قل لي كده.

- مش مهم يا عم.

- لأ مهم! ده قرار مصيري ولازم نفكر كويس.

- يا عقلي هتضيع الفرصة عليا.

- هشش اسمع أنا باباك.

- ايه؟

- دلوقتي في احتمالين.

- هاه.. انجز.

- لا إما لقتك رايح ناحيتها فبعدت عنك بانها تعدي الشارع فعابزك
تبعد عنها يا متحرش يا ملزق يا قذر..

- اتلم!

- لا إممما..

- أيوووة.

- لا إما كانت بتعدي عشان شافت خمسة جنيه في الأرض فراحت
تاخذها بدل ما تقولك وتاخذها انت، يلا باي.

- يا كلب يا سافل! قصدك لا إما كانت بتعدي علشاني وصادف اني أنا
كمان عديت في نفس اللحظة!

ساعتها قام فاتح الشباك بعد ما كان دخل وقام قالي:

- هتعيش لوحديك يا محمد، فوكك من خداع الذات ده أنا قاري علم
نفس وفاهم.

- منك لله! افضل احبطني!

- ي.. ياخذ باله منك..

- عايز ايه حضرتك؟

وكله قعد يبصلي.

- ز.. زي ما كنت أنا.. ب.. بخاف عليكي..

- ده مجنون! أه يا موكي هو المتحرش تاني!

ومسكوني بهدلوني بقى ويا متحرش والجو ده.

خلي موكي ينفعها، متعرفش دي تبقى مع رجالة، تعرف تبقى مع موكي بس. مش عارف ليه كل ما أحكي القصة لمراتي تترمي على الأرض ضحك، دي قصة حزينة، قصة قلب بيتكسر، قصة اتهام في الأعراض، أنا مش متحرش، وانت كمان، #لا_للمعاكسة.. عشان قلبك ميتكسرش زيي يا محيي..

(15)

قاعد أنا وحمزة في شقتي في أمان الله ومراتي عند أمها وراجعة بليل،
اتصلنا بمحمود قعدنا نهزر احنا الثلاثة شوية، لعبت مع حمزة كورة
وممكن أبقى أحكيك على اللي حصل، فالمهم قاعدين في أمان الله وإذ
من حيث لا تدري وهو قاعد بيقالب في تليفونه لقيته قام مقترح اقتراح
ملعون:

- تعالى كده بص، بقولك إيه ما تعمل حساب على البتاع ده وتخش
معانا.

يا ليتك دعوتني للانضمام للصعاليك وليس إلى تلك التطبيقات الحقيرة.

- بيعمل إيه ده؟ وريني.

- تطبيق كده بتبعث أسئلة لناس وبتاع، وبتجيك أسئلة من ناس
عشوائية بردو.

- الله! جامدة الفكرة دي.

- يلا، أعملك حساب؟

- ما مش بفضى يا حمزة.

- يا عم خش كل يوم جاوب سؤالين واخرج.

- اممم.. اعمل مش هنخسر حاجة.

وكم كنتُ مخطئاً، خسرت كثير.

بعد نص ساعة كان حسابي معمول واتحطت صورتني الجامدة وأنا متصور عند الأهرامات وعامل نفسي ماسك هرم عم خوفو والغلاف كان السلحف وهو بيقول: "ودع الأحزان يا ذووق"، وقلت بس كده، خلي بقى الشهرة تشتغل.

شوية أسئلة فضلت تيجي وكانت كالتالي، خلي بالك ان مش كلها بتكون موجهة لك، لكن رسايل بنترمي عشوائي وبتوصل لناس عشوائية، فكانت كالتالي:

- ممكن لايك لصفحتي على الفيس؟ بعمل جزم عرايس.

- جزم عرايس؟

أصابني الفضول فدخلت.

- شغل حلو، لايك، اللي بعده.

- ما تيجي يا منى..

يا خبر اسود! الراجل ده يعرف مراتي؟! أه لأ ثواني، تلاقيه باعتها لواحدة يعرفها وجتلي غلط؟ يمكن..

- ألبس الحجاب ولا ملبسوش يا جماعة؟

حلو، أخيرا سؤال، أجاب بقى.

- البسيه هيكون أفضل بكتير والواحد بيحاول بس يرضي ربنا بأي طريقة ويعوض عن بقية بلاويه، ربنا يزيدك وإيانا هدى وقرب منه.

كملت لف في الرسايل، اللي بعدها:

- ما تيجي يا سماح..

- ايه ده الراجل ده بينده كل واحدة على الموقع باسمها عشان تيجي؟
وبعدين تيجي فين؟ هو عامل حفلة ولا حاجة؟

دخلت صفحته لقيت كمية إباحية لا توصف، بلوك وريبورت وكملت.

- ممكن لايك ل..

لسه بقرأ لقيت إشعار، حد رد على ردي على البننت اللي عاوزة
تتجنب.

- الله! نقاش.

- هو حضرتك مالك هي تلبس الحجاب ولا مثلبسوش؟ دي حرية
شخصية!

ثواني كده.. أنا قعدت أستوعب شوية الأول وبعدين رديت:

- حضرتك.. هي اللي بتسأل.

عشرين ثانية والرد وصل وكان:

- سألتك انت؟ عالم معقدة!

- لا حول ولا قوة إلا بالله! حمز!!!!!!!!!!!!!! امسحلي أم الحساب!

- ليه يبني حصل إيه؟

وريتّه فقال لي:

- لا هتلاقي ناس بتجادلك في أي حاجة تقولها، كبر دماغك.

فكبرت دماغي، بس لقيت البنت بعدها باعثة بتاع سبع رسائل بنتهنمي فيها اني منضم لجماعات إرهابية واني بفجر مولات في وقت فراغي.

- إيه ده يا عم الناس دي؟!!

- يااا عمي طول الوقت هتقابلهم، اعمل نفسك مش شايف وعدي.

قمت طنشت، وقعدت أرد على كام سؤال وأتشتم بعد كل رد، كل ما أقول حاجة تبع صف الصف الثاني يشتمني، لحد ما حمزة بعد بتاع ساعتين قال لي:

- جبت كام لايك؟

- امممم.. صفر.

- ليه؟!!

- مش عارف..

- أنا عندي سبع آلاف.

وساعتها النار قادت في قلبي بقي، انتوا عارفين حمزة بيعد يغيظني
ازاي دايما ويثبتي انه أحسن مني، ماشي يا حمزة..

فضلت بقي أرد واسأل عشان أجيب لايكات كتير وكل اللي بيجيلي
كان شتيمة! في إيه؟! هو أنا يهودي؟! أنا بيني جوز أمك؟! سبعناشر
رسالة شتايم عشان قلت اني مبحش رامي صبري؟ هو أبوك؟!!

وهكذا، ثاني يوم وأنا مع حمزة على الكافيه الغالي اللي بيعزمني عليه:

- عندك كام لايك على الموقع؟

- شغال عليه من امبارح، حتى وأنا في الشغل، كنت حتى باخد آراء
العملاء في إجابات الأسئلة:

- أيوة يا أفندم حضرتك دلوقتي الباقية اتعملت.

- شكرًا بياشا مننحرمش منك، سلام.

- لحظة يا أفندم بقولك..

- اتفضل يا حبيبي.

- هو لو جتلك فرصة تسافر، تسافر لندن ولا نيويورك؟

هو أي نعم شتمني وقفل في وشي بس أديني حاولت.

- ده انت شكلك مهووس بقي بالتطبيق ده.

- جدًا..

وأنا من جوابيا بقوله: "هعديك في اللايكات، وربى ليحصل..".

فضلت أجاب شوية وأشحت لايكات شوية، من نوعية:

- تحداني يهودي أن المسلمين لن يستطيعوا إيصالك إلى 7500 لايك
فتقيت في وشه وضربته بالجزمة اليهودي النجس، لا تخلونني إخوتي.

جتلي شتايم كثير بردو واتهدلت بس جالي بردو بتاع خمسين لايك
من بنت اسمها (لياليا ضلمة من غيرك)، هو يعني لما كان موجود
كان بيحيب معاه لمبة؟ ما هي كانت ضلمة بردو عليكى وعلى اللي
خلفوكى.

بس فرحت، فضلت أشحت شوية وأتخايق شوية لحد ما وصلت 200
لايك!

رحت أغيط حمزة فقال لي:

- بجيبهم في يوم.

يا ابن الـ..

بقيت مسروع مش عارف أعمل إيه، بقيت هنزل الشارع أدي الناس
فلوس عشان تعلمي لايكات، لحد ما قلت بالاس لقتها! أنا هخش
الصفحات المشهورة وأشوف بيعملوا إيه وأعمل زيهم، فكرة عبقرية!

دخلت أكبر صفحة، لقيتها بنت عمالة تنزل مقولات، مش عارف هي
اللي كاتبها ولا لأ، من نوعية: "إذا طعنوك من ظهرك فذلك لأنهم
خلفك".

طبعاً الحوار مكلش معايا بس قلت خلاص ما دام ده اللي بيحبيب.
دخلت صفحتي وكتبت:

- "ربما الليل مظلم، بس لازم علشان نعرف ننام".

شتايم بقى وانت فاكتر نفسك كده روش والكلام ده قمت شايها، اشمعنا
عند البت عملتوا لايكات؟ تطبيق أنثوي..

دخلت صفحة تانية كبيرة شوية لقيت بنت بتنزل صورها.

اممم.. طب أعملها ازاي دي؟ عرفت! هعمل حساب بنت، أي حاجة
بس أجييب لايكات.

عملت حساب بنت وأول ما دخلت لقيت سؤال بيقول:

- اكتب حاجة من تأليفك.

فكتبت حكمتي الشهيرة:

- "ربما الليل مظلم لكن لازم علشان نعرف ننام، أومال نفضل
صاحيين؟!"

ولايكات واسكرينات وشير ووااااو يا فنااانة وبوكك بينزل شهد وانتي
عسل وبتاع، فحسيت في شيء مريب.. أول بوست والصفحة طلعت
على ال-Discover! يمكن علشان حطيت صورة بنت من السويد
جبتها من جوجل؟

- حضرتك ممتازة! في كل حاجة، انتي فتاة أحلامي، ده رقم تليفوني
ولو احتجتني أي حاجة أنا خدامك.

انت عبيط بيني؟ كمية رسائل لا حصر لها وبقي عندي بتاع 200
حاجة وأربعين متابع، يا مجانين! مجتمع أنثوي!

شوية ولقيت حمزة جاي بيقولي:

- بص البت دي جامدة أوي.

وطبعا زي ما خمنت، حسابي اللي ضرب ده والناس بقوا يشيروه.

طبعا من جوايا هموت من الضحك بس ماسك نفسي.

- طب ما تبعتها يا حمزة..

- ما أنا بعتهها، هبعتهها تاني دلوقتي، هي أول ما تشوف صورتي
هتبعته هي كمان.

- انت.. انت اسم صفحتك إيه؟

- آاا.. حمزة الأسطوري..

أسطوري هههههههههه، انت بيني في حضانة؟ جايب 7000 لايك
منين بس!

دخلت صفحتي أدور عليه ولقيته! هو اللي كان بيقول "أنا خدامك"!
ههههههههههه، ضحكت ضحك السنين وبيسألني بتضحك على إيه قلته
بوست عجبني، قالي وريني قلته لأ عيب، مبتحبش انت الحاجات
العيب.

وميت ضحك بقى، بعدها بعث تاني قال:

- أنا شغال في بنك، يعني هدلحك..

وأنا عمال أخذ اسكرينات وأأااااضحك.

المهم رديت عليه وقعدت أكلمه بتاع سبع شهور على أساس اني نرمين وبعدها قلتلته، كرهني واتخانق معايا وخاصمني فترة، بس ألقى سبع شهور في حياتي، من ساعتها ميقاش يعرفني على أي شيء جديد، وساب التطبيق وراح تطبيق ثاني، بس المرة دي سمى نفسه (عالم قاسي.. مجاش مقاسي).

(16)

عارف الناس المحيطة؟ أكيد عارفهم وقابلتهم كثير، قاعد مرة عند خالتي وأكثر شخصية محببة في المجموعة الشمسية كانت هناك، حسبني الله ونعم الوكيل فيها خلنتي عايز أشنق نفسي في النجفة وهما قاعدين، أيا كان اللي عملته، هتخليك تحس انك قطعة من القذارة، لو ستيف جوبز قاعد قدامها هتخليه ينط قدام قطر.

حصل إيه يا سيدي؟ قاعدين وخالتي - الله يسامحها - فتحت حوار الشغل.

- عامل إيه في شغلك يا واد يا محمد؟

- الحمد لله يا خالتي، كله تمام.

- رقوق ولا حاجة؟

- اممم.. لا لسه، الله المستعان.

قامت الست حشرت نفسها في الحوار وقالت:

- حتى لو اترقى، خدمة عملاء يعني هيترقى لإيه؟ وزير؟

يا بنت الـ.. مين دي؟! مين اللي جابها هنا؟!!

- هههه..

كان لازم الضحكة السخيفة اللي وراها رغبات ترصد وقتل دي.

- مشتغلنش بيبي ليه شغلانة عدلة شوية؟

يا ولية يا بنت الفاعلة..

- ما اللي موجود يا أمي.. ملقتش غير دي، والحمد لله مريحة يعني..

- مريحة بتأخذ كام يعني؟

- 2000..

- 2000 ومريحة؟ مسم، مواصلاتك دول ولا إيه؟

يعني أرمي نفسي من الشباك اللي جنبي ده عشان تستريحني؟ قلت

أبهرها بقى!

- لسه ناشر كتاب.

- فعلا؟

- آه!

وأنا حاسس اني هزمتها بقى.

- باع كام نسخة؟

- بتاع 3 آلاف..

- ده اللي بيخشوا السوبر ماركت عندنا في ساعتين أكثر من كده، مسم.

واللي خلق الخلق لاعرف مكان السوبر ماركت بتاعكم فين وأجي أكسره وبعدين أروح مع البلطجية نحرق المخازن.

- شوف بيني حاجة تفيدك في حياتك.

- حاضر يا أمي، أفتح سوبر ماركت؟

- لأ ولا هنتبيع، ده احنا عشان الناس عارفينا من زمان وبيحبونا بس.

- ماشي يا أمي، ربنا يوففكم.

- اتجوزت؟

- أيوة..

وأنا خايف من اللي جاي..

- بقالكم أد إيه؟

- أربع سنين..

- لو كملتوا خمسة يبقى عال أوي.

يا ولية انتي من أحبار اليهود؟! إيه السواد ده؟!
مستحملتش ودخلت لخالتي في المطبخ عشان أبعد عن الولية دي
فقالنتي:

- إيه عايز حاجة؟

- الولية دي هتجنني!

- معلش اقعد بس معاها دقيقتين وأنا هاجي أقعد معاكم.

- أووقف، طيب!

أول ما خرجت من المطبخ:

- خلفت بقي على كده يا محمد؟

لحنا مخلفناش ومش عايز اديها فرصة فكذبت:

- أيوة! ثلاثة!

- ما شاء الله، ثلاثة في أربع سنين؟ ده ولا الأرانب.

بردو في انتقاد؟! الولية بتحسد عيالي اللي لسه مجوش!

- الحمد لله نعمة.

- العيال مريحينك؟

- جدًا.

وخالتي سامعها بتضحك جوه بصوت واطي.

- صحتهم كويسة بقى ومهتم بتغذيتهم؟

- آه وبيشيلوا حديد.

- حديد؟ وهما عندهم سنة واثنين؟

- أيوة، أصغر واحد لؤي حجز تله في الجيم يوم ما اتولد، وبيقروا كل يوم 17 كتاب وعلّي اتعاقد مع ناسا هيطلع رائد فضاء.

- رواد الفضاء دول ولا ليهم أي لازمة.

- انفجر الصاروخ وهيطلع دكتور.

- حرامية ومعندهم مش ضمير.

- خالتوووووووووووووووووو!

خالتي طلعت من المطبخ أخيراً ومعاها صنية فيها فراخ كثير محمرة كده وقالتي:

- خش هات سرفيس الرز من جوه.

إيه يا خالتي؟ انتي عازمة الملك آرثر الرابع؟ ده احنا تلاتة!

وبعدين فهمت هي مكثرة الأكل ليه.

- حاجة ما شاء الله عز!

أول ما الست قالت كده قامت خالتي بصتلتي بفخر كده اللي هو
"شاييف؟".

دخلت وأنا بجيب سرفيس الرز قمت وأنا خارج واقع على الأرض
ونصفه اتدلق.

- مش عارف تمشي؟

يا خالتو وربنا لاليسها السرفيس في وشها!

- معلش يا خالتو والله غصب عني.

بان على خالتي انها اتدايقت بس قالتلي:

- خلاص خلاص، لم بس اللي وقع..

قعدت ألم الرز بحسرة كده ودخلت المطبخ أرميه في الزبالة وبصيت
على السكاكين كده وبقيت عايز أسحب واحدة أدبها في زور الولية أم
أربعة وأربعين اللي قاعدة برا دي.

- ألا قوليلي يا فاطمة.

- اتفضلي.

- الشاشة دي كام بوصة؟

أن أن أألان، البسي يا خالتي، مش دي صاحبتك؟

- ات.. انتنين و.. وأربعين..

- بس؟

عرفت بقى ساعتها ان الحرب هتبدأ، قاعد جوه بقى في قمة السعادة
في المطبخ وفرحان اني لقيت عذر أهرب بيه منها وتركز مع حد
غيري شوية.

- ما هو كبير أهو يا سعاد! هنعمل سينما في البيت؟

- اللي عندنا اتنين وخمسين.

- طيب ربنا يزيد ويبارك أنا مالي؟

- بقولك يعني.

قاعد بقى أضحك جوه بعد ما لقيت خالتي قابت كده وبعدين الست لسه
بتقول:

- هو السجاجيد دي م..

- كلي يا سعاد! الأكل هيبيرد!

- طيب يختي، كنت هقولك بس السجاجيد م..

- بعد الأكل!

- طيب..

وأنا قاعد بتتطط من الفرحة جوه.

- إيه ده هو الرز ده من أنهى نوع؟

سمعت بعدها صمت وأنا سادد بوقي ومناخيري عشان منفجرش
ضحك فعرفت ان الصمت ده معناه ان خالتي بتبصلها بصوات تكاد
تطلع منها نار تحرق الرز اللي قدام الولية.

- مش عاجبك متاكلش يا سعاد!

أوووووه صرااع العمالقة!

- أنا بقولك بس..

- لا يا ماما متقولش، ده من أفخر الأنواع ومن الغالي! ولا تشوفيه
حتى ولا تسمعي عنه، انتوا بتاكلوا من الزبالة.

- ماشي يا فاطمة كتر خيرك..

أنا في اللحظة دي كنت حرفيا برقص جوه المطبخ.

خالتي شغلت التليفزيون عشان الست تتلهي شوية في حين ما بتناديني:

- محمد انت نمت في المطبخ؟! ما تيلا!

- حاضر هغسل أيدي بس.

اضطريت أغسل أيدي على طول وأخرج، لسه خارج قامت الست
بصنلي فتجهزت للبلوة اللي هسمعها، بس التليفزيون أنقذني، عشان
أول ما انتفتح الراجل بتاع الأخبار قال:

- الملياردير الفرنسي (كوستاك..).

لسه بيكمل قامت قابلة:

- حلوه علي، دي الناس اللي عايشة.
- علت خالتي الصوت وهي بتبصلي وعارفة أنا كنت مطول في المطبخ
ليه، عشان أسيبها تلبس مع الولية، بس عملت نفسي عبيط.
- اشترى جزيرة في وسط المحيط، وسائل التواصل الاجتماعي كلها
تتحدث عن هذا الخبر. سيقوم الـ..
- أد إيه الجزيرة دي؟
- بصيت أنا وخالتي لبعض وكنمنا الضحك كده في حين ما كمل المذيع:
- وقام بطلاء نخيلها بالذهب، في حين بنى عشرة قصور فيها و..
- هتيجي موجة تشيل كل الكلام ده.
- وبنى سوراً من الألماس حول الجزيرة كلها.
- الألماس رخيص عندهم أصلاً.
- كل هذا احتفالاً بفوز والده في سباق الجري في الأولومبياد وعمره
قد تخطى الستين عاماً.
- ستين بس؟
- بصيت للست كده وتحت وقلتها:
- ده سنه يا حاجة.. مش فلوسه..
- ستين دول ولا حاجة بيني. انت جايب التلفون ده منين؟

- خالتو..

- ايه يا بابا؟

- أنا دقيقة وهنط من البلكونة عندكم هنا.

- عيب يا محمد!

- عايز تتط من السابع؟ مسم، طب قول حتى التاسع..

(17)

بص يا عم، بص عشان متترفزش، واحد مرة بيقول لي: "كل حلم له معنى، مهما كان يبدو غريب".

كنت هتجنن! فحكته على المرة اللي شفت فيها أستاذ مربى، بص بص هحكبك.

كنت جاي أنا ومراتي مرة من السبتية بنجيب لابس وأول ما دخلنا كنت هلكان موت بقى، هي دخلت المطبخ تعمل عشا وأنا خخخخ كنت خلاص في سابع نومة، وبهدومي وبالجزمة وكل حاجة، اترميت كده على طول، مش عارف هما ليه بيقولوا "سابع نومة" ليه سابع؟ ما علينا.

هي بقى أتخيل انها خلصت العشا جت لقتني ميت فقعدت تشتم شوية وبعدين كلت لوحدها.

المهم أنا بقى كنت فين؟ تعالى بقى معايا لرحلة بداخل عقلي المريب غريب الأطوار.

غاية بعد وقت العصر، قبل غروب الشمس بحبتين، أصوات غريبان في كل حته، صوت خطوات ورايا بتكسر أغصان الشجر، التقتت ورايا مرعوب لقيته ابن عمي.

- محمد! بتعمل إيه هنا؟!

- مـ.. مش عارف..

- تعالى!

- ماشي.

مشيت وراه عشر خطوات ولا حاجة وبعدين بص وراه ولقيته وش
كينيدي رئيس أمريكا، بيقول لي:

- لا بد للقوات الأمريكية أن تتحلى بالـ..

- يا عم انت جيت هنا ازاي؟ فين ابن عمي؟ وليه بنتكلم عربي؟!!

- وعلى بائعين الفطير بالجينة أن يضيفوا المزيد من الجينة وإلا ستقوم
القوات الـ..

- جينة إبيهه؟! إيه اللي بيحصل ده؟!!

قعدت أصرخ كده وفي لحظة كنت في مكان ثاني، كنت في ملهى
ليلي، طبعا فورا قمت قايم من على الكرسي وقايل:

- أعوذ بالله! إيه ده؟!!

فلقيت المنصة عليها جراح بيعمل عملية قلب لواحد.

- يـ.. يا دكتور.. حضرتك بتعمل إيه هنا؟

الدكتور بصلي كده، وقال للمساعدة اللي معاه:

- ناولينني الشاحن وطلعي الولد ده برا المستشفى.

- محمد.
- أيوة يا بابا.
- تعالى بيني هقولك نصيحة..
- قول يا أبويا.
- الجبنة فيها كام سعة حرارية؟
- الـ.. الجبنة فيها كام سـ.. معرفش يا أبويا، وبعدين أد إيه جبنة بالظبط؟
- عارف عمرو دياب؟
- أيوة..
- الجبنة بقى، فيها كام سعة حرارية عشان عايز أسافر الصين حالالا حالالا!
- وببص لقيته بقى ماسك شنطة سفر واحنا في المطار وبيقولي:
- خليك هنا عشان هدفع تمن التذاكر وهرجع ومش هعرف أفكر، فهتفكر لي انت.
- إيه يا بابا شغل أرض زيكولاده؟! مال التذاكر ومال تفكيرك يا أبويا؟
- فليحيى سعد زغلول حيا وميتا.

- يا فرج الله! بتتكلم عربي!

سابتتي وطلعت تجري على عنقود عنب أحمر كبير عنده عينين
ضخمتين كده بيمشي وحننته.

- اشمعنا هو؟!

- ازيك يا ولدي.

- أهلاً يا.. أس.. أستاذ مربى؟

- أهلاً ببيك يا ابني.

فضلنا ساكتين بعدها شوية فقعدت أبص حواليا وبعدين بصيت للبت
اللي لسه حاضناه وهو عمال يبصلي ويبتسم فقلته:

- ممكن أخذها؟

- تدفع كام؟

- أعوذ بالله! هي بضاعة يا عم مربى؟

قامت البت بصتلي وشعرها اتحول لثعابين زي بتاعت شركة
المربعين المحدودة كده وقالتي:

- أستاذ مربى!

- حاضر حاضر خلاص.. أستاذ مربى..

- دي بنتي يا ولدي.

- انت ليه بتقولي "يا ولدي"؟ ليه بتحسني انك عبد الحليم؟
- فجأة لقيت نفسي في حفلة لعبد الحليم وهو بيقول:
- أجري عليه وأشتاق إليه أنا، حبيته ليه؟ فشكلتوا ليه؟ قطعوا هدموم بعض لبيبيه؟
- طبعا أنا مش فاكركلمات فعقلي بقى بيحط أي بطيخ، المهم.
- خرجت من الحفلة لقيت أستاذ مربى واقف برا بيقولي:
- العفش عليك والشقة عليك.
- والسلام عليك ورحمة الله، ابعده بقى يا عم مربى مش وقته.
- وبعدين قمت صاحي من النوم، مراتي بتقولي:
- محمد انت نمت؟
- آه..
- ببص لقيتها حاضنة عم مربى وبتقولي:
- تشتري؟
- يوووووه! هو أنا لسه في زفت حلم؟!!
- التليفزيون عليك وقنوات الأخبار علينا.
- عم مربى! هقطعك!

- تتحداني؟!!

- إيه؟

فجأة لقتني أنا وأستاذ مربى في حلبة مصارعة وهو لابس شورت جينز وبيعملي علامة جون سينا، ضربني ضربة تحت الحزام صحيت من النوم.

- منى!

محدث رد.

- منى! انتي فين؟!!

- إيه يا حبيبي مالك؟

وجاية تجري.

- هو أستاذ مربى فين؟!!

- أستاذ إيه؟

- هو أنا بحلم ولا صحيت؟

- لا يا حبيبي انت صاحي، كنت شايف كابوس ولا إيه؟

- آه.. الكلب الجبان.. عاوز يبيبعك ليا..

بصتلي باستغراب كده ورجعت الصالة تاني.

- الله يهديك يسطا..

قمت غسلت وشي وطلعتها في الصالة، قاعدة بتتخرج مع مين؟

- أستاذ زفت! انت بتعمل إيه هنا؟!!

- جبتك قنوات مشفرة.

- عاوز أصحى بقا!!!!!!!!!!!!!!

وقعدت أصحى وأنام وأصحى وأنام وثلاث أيام متتالية أشوف أستاذ مربي، لحد ما جنلي فوبيا من المربيات كلها، بقيت كل ما أشوف مربي أتخيلها بعينين وعايز بييعلي بنته.

وأحلام كتير ليا بقي غريبة كده، فمتجيش تقول لي "كل حلم له معنى"، لأ ده عقلك عمال يلعب بس، رحتمرة لمفسر أحلام وحكته حلم أستاذ مربي زي ما قلتهولك كده، تتخيل قالي إيه؟ تخيل!

- والله وبقي عم مربي بيجري ورايا بعدها لما دخلت في ثورة 52.

- أستاذ مربي.

- آه.

- اتفضل برا.

(18)

أنا مش بائس، أناااا مش بائس!! مفهوم؟!

كنت أكرر هذه الكلمات على نفسي وأنا قاعد مستني محمود في حنة
زحمة كده، وحواليا 500 ولد مع 700 بنت!

هتقولي يا محمد "انت ساقط حساب؟" هقولك أيوة لكن غالبا بيكون في
ولد معاه كذا بنت، تقريبا واحدة بتكون صاحبتة وجايبة معاها
صاحباتها عشان ميتعصبهاش ويسرقها ويرميها في طريق الوادي
الجديد، أو عشان لما أمها تقولها: "انتي مع ميين يااا به؟" تقولها: "أنا
مع صاحباتشي يا ماما" وتديها ريهام نكلهما.

المهم، أنا واقف بقى بكح وهطلع البخاخة بتاعتي أتنفس منها من كمية
البرفانات، خنقتينا!! والله ما هيتجوزك عشان عارفة ترشي برفان! ما
أي كلب ممكن نرش عليه برفان عادي، ده مش بيضيفلك شيء! ولا
انتي فاكرة انه زي ما انتي شفتي في الإعلان اللي نزل وانتي صغيرة
قاعدة بتاكل محشي على الطابلية وجت إعلانات قبل ظاظا وجرجير
فيها البت ماشية وشعرها مرسوم بألوان المياه ولا بسة فستان اسود
وواحد ببدة معدي وشبه براد بيت وأول ما يشم البرفان يلفوا الاتنين
في لحظة واحدة ويضحكوا - لسبب ما- وفي خمس دقائق بيكون
عازمها في محلات الأغنيا اللي السندوتش فيها بأكثر من عشرين
جنيه.

تخلي كده ماشية واحد لف مرة واحدة وضحك وانت لفتي لقتيه
باصصلك وبيضحك، بخاخ الفلفل الأسود وفي عينه المنحرف، متخيلة
كمية الهبل اللي في الإعلانات؟ أنا ممكن أقعد للصباح أحل الإعلانات
دي وأقول هي ليه غلط ومش منطقية، وكل الناس ماشية ببديل وهي
بتنزّل تشتري الفول بالفتان، وعاملة شعرها عشان هتعدّي تجيب
صابون مواعين بعدها، ارحمونا بقى!

فانتي مليتي البنيو بتاعكو اللي كنتوا بتبلبطوا فيه برفان وقمتي ناطة
فيه بهدومك، قال يعني خلاص الشباب هتطلع تجري وراكي، أبوس
إيدك، كفاية، مش عايز أكره جنس الحريم بسببكم.

المهم، قاعد مستني محمود وشايف بقى الهى والمى، وهي بتضحك
على كل حاجة هو بيقولها وهو على وشه ابتسامة بلهاء وفاكر انه هو
روش فعلا بس هي بتراضيه بس بكل طريقة عشان ميسيبهاش وتبقى
سنجل وعقدة النقص تشتغل، وكل خمس ثواني تلايك عشان تحط
إيدها على إيدته ولا كتفه وشغل تلازيق وقرف، وهو عمال يفرك
عشان يحط إيدته عليها وهي بتحاول تخليه ميلمسهاش - ده لو حصل
يعني - وهو يفرك ويسبل لها وأنا متوقع بيقولها:

- يا بت انتي هتبقى مرالتي يا به، زي ما قلت لخمسة وعشرين واحدة
قبلك.

- إيه؟! -

- لا لا بهزر.

- آه.. بحسب..

- هما أربعة وعشرين بس، انتي الضحية رقم 25.

وشغل آخر زفت، حسيت اني في ملهى ليلي.

كله كوم واللي قاعد مع واحدة متدربين وعمال يلمسها ده كوم تاني،
يا حكووومااااا، يا حظااااا! حضرتك شايف؟! اغتصااااا!

وهي عمالة تضحك، بتضحكي؟! بتضحكي على إيه يا خايبه؟ انتي
زي السجارة، هيستمع بيها وهيرميها، زي الأربعين اللي قبلك، ما
علينا.

قاعد بقى في وكر الشيطان ده لحد ما طهقت، رحنت أتمشى كده وقلت
هستاه في حنة تانية، ده انتوا الشيطان واقف بيقول لكم:

- يا إخواننا أنا قلت نفسد أه لكن.. كده كثير بصراحة! أستغفر الله
العظيم يا رب، انت يا ابني انت ياللي على جنب! انت معندكش أخت
ولا أم؟!

وأنا ماشي قمت متصل بيه.

- أيوة يا كبيير.

- انت يا زفت مجتث ليه؟!

- يا ريس أنا في العربية أهو.

- طيب تعالالي عند محطة المترو على طول، أنا مشيت من المنطقة
القذرة دي.

- لبييه بس يا كبيبير؟ ده أنا مختار المنطقة دي بالتحديد، دي طرية خالص!

- طرية؟! طرية إيه يا زباله؟ عايز تبقى من الحثالة دول؟!!

- يسطا متحبكهاش بقى..

- انت اللي فاتحها بزيادة يا أخويا، ده انت معندكش ريحة المبادئ!

- خلاص يسطا هجيك عند المترو وبعد ما نخلص مشوارنا هروح أنا أشقطي حتة.

- حتة؟! محمود انت ضارب حاجة؟

- يسطا ما الحاجات مرمية أهي في المكان ده، الواحد يخطفه حتة! ما ببلاش! كنت هجيك حتة انت كمان بدل ما انت بانس كده.

أنا ساعتها عقلي عمل ERROR 404 تاني، هو بيقول إيه؟!!

- محمود حتة إيه هما مش بيوز عوا حلاوة المولد، دي مش حاجات دي بنات ناس!

- يا عم منخشلش بقى في شغل "بنات ناس" و"أختك" والجو ده، هو في بنات ناس بتقعد القعدات دي؟! ما تصلي على النبي.

- عليه الصلاة والسلام، أنا مروح يا محمود، سلام.

قفلت في وشه وركبت المترو، وأكاد أقسم انه راح بردو "يخطفه حتة" على حسب تعبيره، هو أنا بعرف الأشكال دي ليه؟!!

(19)

أنا رجل free في نفسي كده، بكره دائماً التقيد بقواعد، ومحبش حد
يقولي اعمل إيه ومتعلمش إيه غير ربنا، إنما إنسان زيك زيي
وتؤمرني لأ، فعموماً محبش القواعد والأوامر، في بداية الجواز
مراتي مكانتش مستوعبة ده، فجيت مرة من برا ودخلت الأوضة
رميت الشنطة وقلعت اللبس رميته وقمت ممدد على السرير.

دخلت مراتي ورايا وقالتي:

- إيه ده بقى إن شاء الله؟

- عايزة إيه يا منى؟

- في حد بيرمي لبسه على الأرض كده؟

- هو مش على الأرض على فكرة هو على السجادة.

- شيل يا محمد اللبس حطه في الدولاب لو سمحت، عاوزين الشقة
تبقى نظيفة.

وعينك ما تشوف إلا النور، لقيت نفسي طحت فيها بقى وزعيق
وشتايم وهي تعلي صوتها وأنا أعلى صوتي لحد ما طلعتها برا
الأوضة وقلعت الباب وهي قعدت تعيط برا.

تاني يوم رايح الشغل وهي لسه ميوزة فلبست الجزمة وبعدين دخلت
أجيب إزارة المياه بتاعتي من التلاجة.

- طينها كمان طينها!

- هي إيه دي؟

- بص يا أستاذ! الجزمة عمالة تطين مكان ما انت ماشي!

- ده تراب مش طينة، بالمقشة وهيتشال.

- وأنا خدامة بقي!

- بقولك إيه!

قامت قعدت تعيط تاني ودخلت الأوضة.

أنا بقي افنكرت كل اللي كان بيتقالي قبل الجواز:

- الجواز صعب يا محمد، مش رومانسية وحب وخروجات وبتاع
وبس، ده جزء منه، الباقي تقاهم واختلافات ومسؤوليات وتعب.

- يا خالي أنا بعرف أتعامل، انت مش بتشوفني بتعامل مع الناس
ازاي؟

- الناس دول برا البيت يا محمد، اللي هتبقى عايشة معاك في بيت
واحد كل يوم وتحت سقف واحد حاجة تانية، وأصعب سنة أول سنة،
حاجة مش متعودين عليها و..

- متخافش يا خالي، هتشوف، انتوا بس جيلكم اللي مكانش بيعرف يتعامل.

راجع من الشغل مرة فـ:

- ألو.

- أيوة يا منى.

- وانت جاي هات معاك صلصة وكيسين رز.

- طيب.

- سلام.

- سلام.

بعدها حصلت مشكلة مع السواق واتخانقنا وبتاع فنسيت.

- السلام عليكم.

- وعليكم السلام، هات يلا الرز والصلصة عشان أعمل الأكل بسرعة.

- انتي لسه هتعملي الأكل؟

- أيوة يا بابا أومال بطلب منك رز وصلصة ليه؟ هلعب بيهم؟ هاتهم يلا عشان أبدأ على طول.

- نسيتهم يا ستي! وبعد كده نعرف الغدا عايز إيه من بدري، مش وأنا
مخلص الشغل وجاي نشوف!

- طب انزل طيب هاته بسرعة طاه!

- يا منى وأنا على الباب لسه بتقوليلي انزل؟! انتي معندكيش دم؟!
قوليلي ريح طيب! ده إيه القرف ده بس!

قامت دخلت بقى أوضتها وقفلت الباب وأنا قعدت في الصلاة أريح
شوية وبعدين قمت متأفف ونازل أجييب الحاجة.

طلعت لقتها لسه في أوضتها ولسه هفتح الباب لقتها بتقول:

- يا ماما أنا طهقت والله، أنا كنت متعززة منكرمة في بيت أبويا.
الجملة دي جننتي بقى، قمت بقى محستش بنفسي وأنا بفتح الباب
وبقولها:

- طب ارجعي لبيت أبوكي يا روح ماما! جاية ليه؟! امشي!

وسامع أمها بقى عمالة تزعق وبتاع من السماعه وهي قامت تعيط
وزقتني طلعتني برا وقفلت الباب.

قعدت برا بصلصتي والررز وهي شوية وخرجت من أوضتها لابسة
لبس خروج وقامت نازلة.

- طب هعمل إيه أنا دلوقتي؟

قلت أطلب أكل من برا بقی، قعدت أطلب في ورق الإعلانات اللي
بحفظ بيه لحد ما لقيت ورقة إعلان كشرى (سمبوسة)، مش فاهم
الفكرة بس اتصلت بيه.

- ألو..

- اتفضل.

- أستاذ سمبوسة؟

- نعم؟ محل سمبوسة أيوة اتفضل، إيه طلبك؟

- عاوز علبة كشرى..

- بكام يا أفندم؟

- بص أنا معايا كيسين رز، تاخدوهم تستقادوا بيهم وتدوني العلبه
ببلاش؟

- انت هتهزر يا أفندم؟

وبعدين لقيته بيتكلم مع اللي جنبه بيقول له: "واحد بيستظرف" قام قال
له: "اقفل في وشه الحيوان ده، لما الحاج بيجي هيروقه"، وقفل في
وش الحيوان.

بتصل بعدها لقيته بلك رقمي.

- منكم لله.

قعدت أقلب لحد ما لقيت إعلان محل كباب والعنوان انه جنب
سمبوسة.

- ألو ، اتفضل يا أفندم.

- بقولك..

- أوامر يا أفندم، هتطلب إيه؟

- لأ هطلب كباب؟ هههه هو أنا لاقى أكل؟

- أوامر يا أفندم.

- محل سمبوسة جنبك، ممكن بس تقوله بيعتلي علبة بخمسة؟

- ههههه، حضرتك بتهزر يا أفندم؟

وبعدين لقيت حماتي بتكلمني فمش عارف دست على إيه فبذل ما أرد
عليها وأسبب الثاني على الانتظار لقيت حماتي بقت في المكالمة
معانا.

- أبوة يا حماتي.

- ينفع كده يا محمد؟

- يا حماتي ما جيت من الشغل ومش عاملة أكل، أنا جعان يا حماتي!

- طيب ميستا هلش الحوار يعني، ما بالهدواة كل حاجة.

- معرفتش أتصرف بقى يا حماتي..

- تعالى يلا اقعد عندي وأنا هعملك غدا وتاكل ووانت مروح تاخذها معاك.
- مش قبل ما تعتذر.
- محمد، خلاص بقى، عشاني أنا.
- طيب يا حماتي، يا ريتهها كانت زيك والله.
- أموركم هتتصلح بإذن الله يا حبيبي، محتاجين وقت بس.
- بإذن الله يا حماتي.
- يلا تعالى وأنا هعملك أكل انت بتحبه.
- ماشي، أحسن من بتوع المحلات الحرامية ولاد الـ***.
- هتطلب حاجة يا أفندم؟
- إيه ده؟ مين ده يا محمد؟
- إيه ده انت على الخط ازاى؟! اقفل يا حيوان! بتتصنت على شؤوننا العائلية؟!!
- اقفل يا سافل! بتعاكس؟!!
- يا أفندم حضرتك مـ..
- حيواااااان!
- وقام الراجل قفل.

نزلت لحماتي وأنا بطني بتكركر وأول ما دخلت عندهم حماتي بقي
بتضحك في وشي ومنى كانت قاعدة قامت مبوزة وداخلة جوا.

- بتدخلي عشان شفتي جوزك يا منى؟! -

- ششش ملكش دعوة بيها بقي، تعالى اقعد يلا وهحطلك تاكل.

- طيب يا حماتي.

قعدت بتاع خمس دقايق ريحت وبعدين دخلت لحماتي المطبخ وقتلتها:

- سندس.. -

- إيه يا حبيبي؟ -

- أنا هخش أصلحها، اشطا؟ -

- أيوة كده! شاطرين يا ولادي يلا خش.

- ماشي يا اسطا.

- بس خليك حنين بس وطوّل بالك.

- عيب عليكي.

- ماشي يا أخويا، يا رب مسمعش صريخ بس.

- ههه متخافش يا سندس باشا.

- ماشي بخويا، يلا خش.

- طاه.

دخلت لقيتها قاعدة بتعمل إيه؟ بتلعب بالعرايس اللي كانت عندها هنا
قبل ما تتجوز، يا روجي!

- احم..

قامت متديرة وسايبة العرايس وبصت ناحية الحيطه.

- ممكن ألعب معاكي؟

- لأ..

- طيب ربنا يخليكي والله مش عارف أشكر حضرتك ازاي.

وقمت قاعد جنبها على السرير قامت قالتلي:

- ااعد في حته تانية، متعقدش جنبي!

تجاهلت الجملة دي وقتلتها:

- هو الـ.. البقرة دي اسمها إيه؟

قامت بصت كده لقتني بتكلم على عروستها قامت ناتشاهها من ايدي
وقالتلي:

- دي بتاعتي ملكش دعوة بيها.

- اسمها إيه طاه؟

- ملكش دعوة.

- اسمها تختخ؟

- اسمها مي..

- مي؟! حد يسمي بقرة مي؟!!

لقتها ابتسمت كده وبتحاول تداريها فحسيت بالنصر كده.

- يعني المزارع بيخش المزرعة وهو ماسك كوباية وبيقول لها: "يلا يا مي، نزليلي شاي بلبن النهاردة عشان الفطار"؟

- البقر بينزل شاي بلبن؟

- آه لو اسمه مي يبقى أي حاجة ممكنة.

- هههه..

والضحكة اللي بعد الزعل دي بالدنيا والله.

- والزرافة دي، اسمها إيه؟ تفيدة؟

- اسمها (صاحبة العنق الطويل).

- اشمعنا يعني البقرة مش صاحبة الكرش الكبير؟!!

بردو ابتسمت بس بتحاول تكتم الابتسامة وترجع للوش الزعلان تاني على طول بتاع الأطفال اللي لما بيمدوا شفقتهم اللي تحت لقدام ده.

- منى..

- نعم؟

- انتي بتحبييني صح؟

فضلت ساكتة شوية وبعدها لفت ببطئ كده وهي مادة شفتها اللي تحت كده وفضلت تبصلي من تحت كده.

- أنا آسف..

قامت مرمية بقى في حضني وعايط بقى ومناحة.

- أنا أ.. أ.. أنا ك.. كنت ع.. عمالة أ.. أ.. أعيط و.. و..

وأنا عمال أطبطب عليها وأقولها:

- خلاص يا حبيبي خلاص، خلاص اللي حصل خلص متعيطيش.

- و.. و.. وماما ق.. ق.. قائلتي ه.. ه.. هيسيبك و.. و.. و..

وعمالة تنهج بقى كده بس صعقتني جملتها.

- حماتي قالت محمد هيسيبك؟

- أ.. أ.. أبوة و.. وده خ.. خالني أ.. أعيط أك.. أكت.. أكثر..

هي لما بتعيط أو بتزعل بتعمل زي العيال الصغيرة كده فدي حاجة طبيعية، ومن الحاجات اللي بحبها فيها أوي.

كنت عاوز أطلع أتاخاق مع حماتي عشان قائلتها الجملة دي بس مقدرتش أسببها كده، ففضلت حاضنها وهي فضلت نفسها يتقطع وهي بتعيط كده تاني.

- لا يا حبيبتى كلام فارغ، احنا هتحصل بيننا مشاكل وهنتعصب
ونتدايق زي أي اتتين لكن أسيبك؟ ده انت روجي يا ماما! أسيبك
وأموت يعني؟!

لقتها بقى ابتسمت كده ورفعت راسها وقالتلي:

- مـ.. مـ.. ما انت قلـ.. قلنتي امـ.. امشي..

- لادي حجة بس عشان أمك تطبخلنا وأريحك.

لقتها قعدت تضحك وقامت ضارباني كده وقالتلي:

- مـ.. مـ.. متـ.. متقوليش امـ.. امشي تـ.. تاني..

- حاضر، وانتى متقارنيش بين عيشتك معايا وعيشتك قبلي ماشي؟
المقارنة دي مش حلوة وبتزعل ماشي؟

- مـ.. مـ.. ماشي..

- يبنتي انتى هتعملي زي الواد بتاع الحضانة؟ بتدايني عشان تنطقي
الكلمة؟

- هههه.. ههههههه.

قعدت تضحك بقى وقامت داخلة في حضني تاني.

شوية وحماتي بقى ندهت:

- يلا يا ولاد الأكل اتعمل!

- يلا يا ماما عشان ناكل.

- م.. مليش.. نفس..

- حتى لو هأكلك بإيدي؟

سكتت كده وضحكلي وقالت:

- إذ.. إذا كان ك.. كده ماشي..

ضحكنا بقى وقمت واخذها في إيدي لحد برا وقعدتها جنبني وقعدت
أكلها وحماتي بقى في سعادة اللي فاز باليانصيب.

قلت خلاص هكلم حماتي في اللي قالتها لحد برا وقعدتها جنبني وقعدت
فيه قدام منى وتندايق أو أخرج حماتي قصادها.

قاعدين بناكل ومرة واحدة تليفوني رن.

- التليفون جنبك يا حماتي، شوفي مين.

- رقم غريب.

- هاتي.

رديت ومش عااراف إيه اللي شغل الاسبيكر فلقيت واحد بيزعق:

- يا *** يا ابن ال***، ده مكان شغل يا حيوان! بنتصل ليه؟

وقفوا أكل هما الاتنين وبصولي فقممت قلنله:

- عم.. عم سمبوسة؟

ماتوا الاتنين ضحك وأنا قفلت في وشه بعد ما قال:

- سمبوسة دي تبقى..

(20)

اممم.. أهلا.. ضحكت شوية صح؟ كويس.. عاوز أكلمك شوية جد قبل
ما أسيبك وأمشي بقى.. كل اللي حكتهولك ده.. كان.. أيامي الحلوة..
الحاجات اللي فاتت، كل حاجة اتغيرت بعد ما أنا ومنى انطلقنا،
وحمزة ومحمود علاقتهم بيا اتقطعت مع الوقت، قالولي انهم زهقوا
مني ومن أفعالي.. أه وش كده..

فاكر عياط منى وأنا قاعد في بيتهم وقرابيها قاعدين وببصلها من آخر
الصالة وهي في أولها وبتبصلي وعلى عينها كسرة السنين، مش
مصدقة اللي بيحصل، لكن مش هنعرف نكمل كده، اضطررنا
للطلاق..

- وهو أنا عمري هسبيك يا هيلة؟

- والله ما تقدر، ده أنا أفتاك! وربي أأجر قاتل ماجور يجيبك حتت.

يا ريتك كنتي قتلتيني يا منى.. قبل ما أشوف اليوم ده..

قبل ما تكرهني وتكرهيني.. احنا الاتنين اتفقنا على ده.. مش قراري
وحدي ولا قرارها..

السبب الأول اننا مش متفاهمين وكل شوية نتخانق.. أنا أغلب اللي
ذكرته المواقف الحلوة بس.. ما علينا..

السبب الثاني اننا مش هنعرف نخلف مع بعض.. هي ممكن تخلف مع
راجل ثاني، أنا شخصيا مش فارق معايا ولا عايز عيال زي ما
قلناك.. بس هي نفسها.. ومقدرش أمنعها من ده..

- هسمي أول ولد محمد..

- ههههه، ملقتيش إلا محمد؟! الواد هيبقى اسمه (محمد محمد)؟ يا
هيلة!

- ما بحبك وعاوزة اسمه يكون على اسمك.

- وأنا كمان بحبك.

- وكمان عشان أرازيك ولما أندع أقول "يا محمد" تجولي انتوا الاتنين
وأرجع واحد منكم ههههههه.

- هههههههه، ربنا يخليكي ليا ويرزقنا يا حبيبي.

بس لو خلفتي متسميهوش محمد يا منى، مش حابب تفكريني، أنا أي
نعم فكرتك بيا بالحكايات دي لكن.. يعني.. هي معمولة لكل الناس
بردو، وأنا متأكد ان الكتاب هيوصل لك وزميلاتك هيووروهولك
ويحاولوا يطلعولي غلطات فيه ويطلعوني وحش كالعادة، بس عادي..
أديكي يا ستي خلصتي مني ومن لساني اللي (متبري مني) على
رأيك.. ومن إحراجي ليكي في الأماكن العامة بمواقفي (المتخلفة) على
قولك.. وخلصتي من طريقة تربيتي للأبناء اللي شايفها وحشة، فإكر
لما كنا خلاص بنتفق على الطلاق وبعد ما خلصنا كلام جيت جري
ومسكت في إيدك وقلناك:

- طب ما نحاول ثاني!

وبصتيلي بقسوة كده وقتليني:

- هتحاول ايه؟ الدكتور قال مش هيحصل! خمس دكاترة يا محمد، أرجوك.. ابعد عني! أنا جيت آخري منك، كنت مستحيلة حاجات كثير لكن دي كمان؟ لأ، معلىش.

- طب هنتبني يا منى..

- لأ يا بابا اتبني انت، مش انت طول عمرك كنت عاوز تتبني؟ اتبني!

- منى..

- أنا ايه اللي يقعدني معاك؟! مش فاهمة، اديني سبب!

- ... ع.. عشان بحبك..

- لأ في ألف من يحبني، شكرا.

- منى..

عادي عادي.. بس أنا والله فاكرك بالخير.. ولو عزتي أي حاجة في أي يوم قوليلي! والله ما هكسفاك.

- تفكر يا وله مين فينا هيموت الأول؟

- هههه، معرفش، بتفكري تموتيني ولا ايه؟

- بصراحة آه بس ده مش سبب السؤال، عاوزة أتخيل كده.

- غالباً أنا، اشمعنا؟
- لأ أنا اللي اشمعنا؟ ليه فاكر انك هتموت الأول؟
- انتي جدك عايش؟
- لأ.
- طب وجدتك؟
- عايشة آه.
- بالظبط.
- ايه قصدك الستات بيعمر وا أطول؟
- هما فعلاً بيعمر وا أطول.
- لأ عادي يمكن عربية تخبطني ولا حاجة.
- لقيت نفسي ساعتها بحضنها بقوة شديدة كده وعيني برأت وقلتلها:
- بعد الشر عنك! متقوليش كده ولا تقولي على نفسك حاجة كده تاني!
- ههه، حاضر متخافش..
- مقدرش أتخيل فكرة ان حاجة تنذكي دي!
- ههه ماشي يا سيدي متخافش، انت مربى راجل لا تقلق.
- هههه، ماشي يا عم، طب لو أنا اللي مت الأول، هتعملي ايه؟

- يختاااي مناحة، هقعد أولول وأصرخ وأشق هدومي وراجلااااي!

- هههههههه بس ده حرام يا حاج.

- لا بهزر، هزعل جدا طبعًا.. وهقعد بقيت حياتي متجوزش،
وهزورك كل يوم، كده كده هنعيش مع بعض لآخر نفس بإنن الله، أيا
كان مين مات الأول.

- صح.. عندك حق.. راضي ما دام معاك لآخر الحياة.

- لآخر الحياة يا صاحبي..

معلش يا منى ان القدر كان حاجة تانية، عادي..

عادي على فكرة يا منى.. متعيطيش.. مفيش مشكلة، أنا فاكرك
بالخير.. ولو بتقري الكلام ده أرجو أكون ضحكك شوية.. ومكونش
عيطك وأنا بفكرك بالمواقف دي، ولو جوزها بيقرا الكلام ده،
حضرتك معاك نعمة كبيرة أوي، خلي بالك منها.

(21)

كلكم دلوقتي عارفيني.. حد حبني؟ حد كرهني؟ عارف؟ وعارفة؟
الضحك على الشيء المخيف بيقلل حدته.. فأنا خوفي اني أنسى
الذكريات دي.. مش عايز أنسى منى.. وحكاياتنا.. والأيام اللي
قضيناها سوا والأماكن اللي رحناها سوا. الحمد لله اننا مخلفناش.. بس
منى كويسة.. هو سمعت انها هتتجوز قريب، ربنا يوفقها، هيكون
أحسن مني بإذن الله، وبالنسبة لمحمود وحمزة بقوا أصحاب مع ناس
كثير غيري وتم استبدالي، عادي..

أممما بالنسبة لك انت بقى صديقي العزيزييز، فأدينا ضحكنا شوية،
زعلنا شوية، انترفزنا شوية، بس كانت رحلة لذيذة، صح؟ لأ؟ أنا
غلطان اني بكلمك أصلا، منتساش.. "ودّع الأحران يا ذوق" ..



بأي

كانت رحلة لذیذة، أشوفك بعدین..

للتواصل مع المؤلف:

رقم الهاتف: 01121308794

تيليجرام: Mo7ammadon